



HISTOIRE

# CONTENANT

VN ABREGE' DE LA

VIE, MOEVRS, ET VERTVS

DV ROY TRESCHRESTIEN ET

debonnaire CHARLES IX. vrayement

piteux, propugnateur de la Foy Catholique,

& amateur des bons esprits.

*Où sont contenuës plusieurs choses meruei-  
leuses, aduenues durant son regne, à bon  
droit dit le Regne des merueilles.*

Par A. Sorbin, dit DESAINCTEFOY, son  
Predicateur, Doct. Theologal de Thoulouse.



A PARIS,

Chez Guillaume Chaudiere, rue saint Iaques, à  
l'enfeigne du Temps, & de l'Homme sauuage.

M. D. LXXIIII.

AVEC PRIVILEGE DV ROY.

Case

F

39

.326

15745

THE NEWBERRY  
LIBRARY

A TRESHAVLTE ET  
PVISSANTE PRINCESSE,  
Catherine de Medicis , Royne,  
mere de Roys , & Regente en  
France, A. Sorbin, son treshũble  
subjet, desire salut & tout heur.



ONSIDERANT,  
Madame, que de toute  
ancienneté les Prophètes ont eu le soin et  
la sollicitude de reduire  
en escrit les Commentaires des choses  
aduenues au tẽps des Roys & des Prin-  
ces, aupres desquels ils estoient ordonnez  
de Dieu : Et d'autre part me voyant de  
tant fauorisé de sa grace, que d'auoir re-  
ceu l'honneur ( par vostre moyen ) d'auoir  
esté mis en la charge de Prophete aupres  
du feu Roy mon maistre : I'ay pensé ius-  
temẽt appartenir au deuoir de ma char-  
ge, de rediger en vne petite forme les cho-

## EPISTRE.

*ses memorables, que i'ay peu remarquer  
 en la personne, propos, actions, & ver-  
 tus siënes: & aussi les afflictions que les  
 ingrats d'entre ses subiets luy ont don-  
 nees, sans cesser, iusques à l'auoir mis  
 au cercueil. A quoy i'adiouste aussi les  
 grādes faueurs que Dieu luy a faites, &  
 choses merueilleuses aduenues durāt son  
 regne, digne d'estre appellé le Regne des  
 merueilles, si iamais autre le fut. Je ne  
 suis marry, sinon pour autant que n'ay la  
 capacité correstpondāte, ou pour le moins  
 approchant quelque peu de celle, non de  
 Xenophon, descriuant les mœurs, & de  
 Socrates, pere des Atheniens ingrats, &  
 de Cyrus ce grand Roy de Perse, mais biē  
 plustost d'un Samuel, Nathan, Gad,  
 Esdras, ou autres tels diuins Prophetes,  
 pour auoir le moyē de diuinemēt depein-  
 dre les rares pieté, vertu, humilité, &  
 sincerité de ce grand Roy, tant aimé &  
 fauorisé de Dieu, qu'encores son corps au*



## E P I S T R E.

cercueil poursuyuit vigoureusement la iuste vengeance des ennemis de Dieu, les siens, & de son peuple. Et pour autant que de vous nous est procedé tel heur ( apres Dieu ) que d'auoir eu, non seulement ce Roy, mais encores le Roy Henry, à present regnant, son successeur, & auant eux le Roy François, second du nom, que Dieu vueille auoir en s<sup>on</sup> repos: I'ay pensé que ie ne deuois consacrer ailleurs ce mien Traicté, qu'à celle, dont tât de biens & de graces prouiennent à ma nation, qui à iamais recitera à la posterité les merites de voz pieté, magnanimité, & sagesse plus que admirable: Pour entre autres actiōs memorables, auoir durant le temps de la Regence cōmise entre voz mains par le feu Roy, vostre tresaffectionné & obeissant fils, gardé fidelement le riche depost de ceste Couronne ( enuiee de tant d'enuieux, qui en desiroient, & en ont poursuyuy l'entiere suppressiō, mes-

## E P I S T R E.

mes par des moyens plus que barbares)  
à celuy qui en est le vray & legitime  
successeur: sous le regne & cōduite du-  
quel chacun espere, & se promet, moyen-  
nant vostre ayde & secours, Madame,  
renoir la France en peu de temps reduite  
en sa premiere splendeur. Receuez dōques,  
ie vous en supplie treshumblement, Ma-  
dame, ce miē petit labeur, non pour mon  
respect tant soit peu recōmandable, mais  
bien pour les choses memorables, qui y  
sont contenues. Que si i'auois le moyen  
de pouuoir en façon du monde honorer  
la memoire de ce grand Roy, & la vo-  
stre, m'y employerois d'aussi bon cueur,  
que prie Dieu, Madame, à iamais vous  
tenir en sa grace, & bienheurer perpe-  
tuellement voz saintes volonteꝝ &  
actions. Du Bois-de-Vincennes, ce 12.  
de Iuillet, M. D. LXXIIII.



ELEGIE SUR LE TRESPAS DV

Roy tres-chrestien & debonnaire CHARLES IX.

Propugnateur de la Foy, & amateur des bons  
esprits. Par A. S. D. D. S. F.

Qu'est-ce, Muse, qu'à chaudes larmes  
Tu pleures, contemplant les armes  
Pendues deuant ce Tombeau?  
Je pleure sans cesse, & lamente  
D'un grand regret, qui me tourmente,  
Le trespas d'un Prince si beau.

D'un Prince si beau en courage,  
En corps, & sur tout au visage,  
Le plus doux qu'on scauroit penser:  
Et deteste la Parque dure,  
Qui l'a fait mourir auant heure,  
Et son dernier iour auancer.

Tu as raison, Muse gentile,  
De le pleurer, comme la fille  
Qui sur son pere trespaslé  
Iamais de lamenter ne cesse,  
Tant soit que chacun le cognoisse  
Courbé par son aage cassé.

Que dois tu sur ce grand Roy faire,  
Qui des Neuf sœurs estoit le Pere,  
Qui les aimoit & caressoit?  
Et qui d'une main liberale,  
Et largeesse plus que Royale,  
Leurs ennuis ancantissoit?

Pleure, contente, & rassasie  
La douleur de ta triste vie.  
Annonce à la posterité  
Le los (de ta voix nompareille)  
Que ce Roy, des Roys la merueille,  
Abondamment a merité.  
Plus bien que rien.

Εἰς Αρ. Σωρβῖνον τὸν θεολόγον καὶ βασιλικὸν  
ἐκκλησιαστήν.

Μύρεαι, ὦ Σωρβῖνε, μέγαν βασιλῆα θανόντα,  
κάρολον ὠκύμορον, δάκρυσι καὶ συναχαῖς.  
Τὸν κ' ὀλοφύρονται θεοὶ, ἄνθρωποι τε ποθέντες  
κοίρανον δύσεβίης ἥδε δικαιοσύνης.  
Ἐργματα τῷ μὲν ἰδὼν, καὶ φθέγματα θέσκελ' ἀκῶσας,  
μάρτυς ἀληθείης ἀξιόπιστος ἔση.  
Θνητὸς ἰδὼν σεμνὴν ἡγάσαστο κηρόθι φωνήν,  
τὴν σὴν φεγγρομένην πάντα θεοπρόπια.  
Νῦν μάκρ' εὐμενέως τὴν αὐτὴν ἔκλυεν αὐδὴν,  
ἥ δ' ὡς αὐτῷ κῦδος ἀειδομένην.  
Ἀμφοτέρων τιμᾶς θνητὸν καὶ ἀκήριον ὄντα,  
ἔνθα καὶ ἔνθα διδὼς δαίγμα καλὸν σοφίης.

Ν. ΓΕΛ. ΑΥΡ. ΓΑΜΒ.

SONNET DE P. DE RONSARD,  
Gentilhomme Vendomois, à Monsieur  
de sainte Foy.

Nul ne devoit pleurer la mort d'un si bon Roy,  
Que celuy qui sçauoit la bonté de sa vie:  
De ton Prince la mort à la mort as rauie,  
Qui en terre & au ciel vit maintenant par toy.

Il vit là hault au ciel, trionfant de la foy  
Qu'icy tu luy preschas, laquelle il a suivie:  
Et en terre, pour voir son histoire accomplie,  
Oeuura saint & Chrestien digne d'un Sainte Foy.

Le bon pleure le bon, le seruiteur le maistre.  
Rendant l'ame en tes bras constant tu le vis estre  
D'esprit, sans regretter son sceptre terrien.

Au maistre bien heureux le seruiteur ressemble,  
Qui fidele a seruy son Prince tout ensemble  
D'un Prescheur, d'un Docteur, & d'un Historien.

# L'HISTOIRE VE-

I

RITABLE DES CHOSES  
*memorables aduenues, tant durant  
le regne, que le iour du trespas du  
treshault & puissant Roy treschre-  
stien, CHARLES IX. Roy  
vrayement piteux & debonnaire,  
propugnateur de la foy, amateur des  
bons esprits, & de toutes actions  
vertueuses.*



I ma langue e-  
stoit capable  
pour discourir,  
non seulement  
des merueilles  
aduenues souz  
le regne de ce

grand Roy CHARLES IX. ou  
plustost, si sa vie vertueuse, actions  
& propos memorables n'estoient  
assez notoires à chacū, tant dehors

# LA VIE DV

que dedans ce Royaume, & pou-  
uoient estre illustrees par mes es-  
crits ( Peuple Catholique Fráçois,  
ou autre) ie ne m'employay iamais à  
plus volontiers discourir de toutes  
choses par le menu, que ie ferois  
icy:mais ce seroit vouloir secourir  
la clarté du Soleil, à l'ayde de la  
plus petite chandelle du monde.  
Mais d'autât que i'ay eu cest hon-  
neur, que d'auoir esté aggregé &  
cōprins au nombre de ses tref-hū-  
bles & tref-affectiōnez seruiteurs,  
au gré & persuasion de la Royne  
sa mere, & du Roy Henry son fre-  
re, à present regnant: cōment pour-  
rois-ie à ce dernier seruice pendre  
ma harpe, comme dit le Prophete  
aux saules verds, sans selon mō pe-  
tit pouuoir l'honorer du loz de ses  
rares vertus? Cela me delibere-ie  
de faire, non selon ses merites, mais



bien selõ la petitesse de mon esprit.  
 Donc ce Prince debõnaire, piteux,  
 & plein de toute generosit , nas-  
 quit l'an cinq cens cinquante, au  
 mois de Iuin, pour receuoir en ce  
 bas monde, non ce que les Roys &  
 Princes pour vne grande partie p -  
 sent y trouuer, plaisir, honneur, &  
 toute obeissance entre ses subiects:  
 car il y trouua tout le contraire,  
 attendu que les sangliers commen-  
  oient desia   faire bresche   la vi-  
 gne de l'Eglise Gallicane, & la rem *Psal. 79.*  
 plir de leurs gr deuses voix & tref-  
 farouches, qui ne profiter  pas be-  
 aucoup   l'auancem t de la vie du  
 Roy Fran ois second, son predeces-  
 seur, qui par le conseil de sa tresho-  
 noree mere, Princes du sang, & au-  
 tres, festudia de pacifier la tempe-  
 ste, qui desia estoit apprestee sur  
 noz testes, nous mena ant   veu 

L A V I E D V

d'œil des grands malheurs, qui depuis nous sont aduenus. Finalemēt il mourut l'an soixante, laissant ce debonnaire & piteux Prince, non tant heritier & successeur de sa couronne & autorité, que d'une couronne d'épines, de toute douleur, & de toute tribulation, ayant son plus grand cōsolateur apres Dieu; le cueur de sa vertueuse & cōstāte mere, CATHERINE DE MEDICIS, Royne, & mere de Roys de Frāce, participante au bruuage de mesme calice de tristesses & de douleurs, ausquelles elle, & ce Roy nouuellement erigé à la Couronne, accompagnée de deux ieunes Princes, ses enfans, participoit en egale portio. Desia le maltalent des ennemis de Dieu & de ceste Couronne auoit esté descouuert à Amboise, & ailleurs, par aucuns surprins, & puniz,



tât à Amboise qu'au Bois-de-Vincennes, quand apres auoir extorqué de ce bon Roy, de sa mere, & autres Princes & Seigneurs, l'infructueuse, voire dangereuse conference de Poissy, ces beaux fideles reformateurs à la réuerse ( car ainsi Tertullian les décrit) s'emparerēt d'une grande partie des villes & forteresses de cē Royaume, qui ne cousta gueres moins de vies de bōs & fideles Princes, & infiniz autres tresloyaux & fideles seruiteurs de ceste Couronne, qui se sont de bō cueur & vigoureusement employez au recouurement d'icelle, qu'aux Roys anciēs, & infiniz leurs bons & loyaux seruiteurs, sa conqueste & dilatation.

Q V E si la vertu d'acquérir n'a esté plus estimee de tout temps, que la prudence de conseruer les

## L A V I E D V

choses acquises, ie vous laisse à penser, combien on doit estimer grande la fermeté, constance, & magnanimité de ce Roy, qui par prudence & sagesse, ioincte à la force des armes, de laquelle le Roy Henry, son frere, à present regnant, estoit conducteur, a extorqué, & rauy de la main des rebelles, le plus beau & le meilleur de son Royaume, que leur infidelité auoit presque desmembré de la Couronne. De cecy peuuent porter euident tesmoignage les citez de Thoulouse, Rouen, Bourges, Lyon, Orleans, Angers, Blois, & infinies autres : desquelles le recouurement, tant soit qu'il ait cousté cher, annoncera à la posterité les faueurs que Dieu a faites à ce bon Roy, pour ses pieté, debonnaireté, & bonté naïue.

L'an x. de son aage il fut sacré

à Rheims, & sembloit que les larmes, qu'il ietta le iour de son Sacre, pour la difficulté qu'il auoit à porter les habits Royaux, fussent quelque presage des ennuis qui l'ont accompagné tout le temps de son regne: auquel il ne se peult vanter d'auoir eu vn seul mois d'entier repos, & assuré contentement: veu que mesmes les premieres guerres ciuiles estaintes, s'estant proposé par le conseil de la Royne sa mere, d'aller visiter son Royaume, & esprouuer si la veüe de ses subiets pourroit estaindre la fureur desia bien auant embrasée au cueur de plusieurs mescreans, & mal sentās de la Foy, à peine auoit il enuironné son Royaume, qu'ils luy apprestèrent de nouueaux desseins, marritz du grand contentemēt, que les Catholiques auoient d'auoir veu

L A V I E D V

leur Roy, & les Princes & Princesses de sa suyte, si bons Chrestiens. Et fut leur dessein à Valery, à ce qu'on faisoit bruit, l'an M.D.LXVII. environ la feste de la Pentecoste: & ce coup rompu, delibererent le redoubler à Meaux, environ la feste saint Michel: où Dieu se monstra protecteur de son Roy, le deliurât miraculeusement de la main de ceux, qui auoient trop plus de moyen, qu'il n'estoit besoin, si le bon Dieu ne leur eust fermé les yeux, hebeté leurs sens & entendement, non gueres moins miraculeusement, qu'il feit anciennement à ceux qui vouloient inuader la maison de Loth. Et c'est desia la troisieme deliurance, que Dieu luy a impartie, à luy & à son predecesseur le Roy François second, de bonne & heureuse memoire: la premiere



premiere entreprinse ayant esté rō-  
pue à Amboise, la seconde à Fon-  
taine-bleau à la premiere prinse  
des armes, & ceste-cy la troisieme.

LES miserables & malheureux  
entrepreneurs non cōtents des ad-  
uertissemens que Dieu leur auoit  
dōnez, tant à la bataille de Dreux,  
qu'au recouurement des Citez sus-  
dites, qu'à celuy du Haure-de-gra-  
ce, ausquels lieux toutes choses  
leur auoient dit à rebours & à cō-  
trepoil, encores attenterent ils de  
venir assieger pour la deuxiesme  
fois leur Roy, en son ieune aage,  
dans sa ville de Paris, mais en vain.  
Car, à dire la verité, ils accomplirēt  
ce qu'un Seigneur de ce Royaume  
leur auoit dit, les aduertissant de  
ne vouloir prendre Corbeil pour  
Paris, ou Paris pour Corbeil: par ce  
que venans d'assieger Corbeil, sans

LA VIE DV

auoir eu moyen de le forcer, ils pé-  
 soient mieux contraindre Paris,  
 qu'ils n'auoient fait Corbeil. Ils se  
 tindrent donques à saint Denys  
 depuis la fin de Septembre iusques  
 à la saint Martin: s'emparerent de  
 Poissy & d'Argenteuil d'une part,  
 & du Pont de Charenton d'autre,  
 non sans piller, rauager, meurtrir,  
 assassiner, & faire tous autres actes  
 dignes de leur profession. Ce pen-  
 dant le bon Roy aduerty des re-  
 princes des villes d'Orleans, Sois-  
 sons, & plusieurs autres, auoit pour  
 son refuge les prieres, oraisons, &  
 aumosnes assidues: faisoit ordinai-  
 rement chanter, apres l'elevation  
 du corps de Iesus Christ, aux di-  
 uins mysteres Eucharistiques, la  
 querimonie & complainte de Da-  
 uid contre les ennemis de Dieu,  
 cōtenue au Pseaume 78. que ie luy



ay veu souuent deuotement prononcer, avec vne grande esperance qu'il auoit de voir la confusion & honte des ennemis de Dieu, siens, & de son peuple: Et tant perseuera en ceste deuotion, & fermeté de foy, que finalement la veille saint Martin il resolut en son Conseil d'aborder ses ennemis, faire sortir de sa ville de Paris le peu de forces qu'il auoit, avec certain nombre de pieces d'artillerie, du tout estant cōducteur Messire Anne de Mōtmorency, Connestable de France. Et en fut le succez si heureux, que finalement les mescreans y furent rompuz, & mis en fuyte, & leur fut la peur si grande, que quelque belle mine qu'ils feissent le lendemain matin sur le champ, qui est entre Paris & saint Denys, si furent ils contrains de s'enfuyr honteuse-

LA VIE DV

ment, & confesser, bon gré malgré qu'ils en eussent, la rigueur de la main de Dieu, portant la cause de leur Roy; & poursuyuant leur desloyale impieté. En ceste bataille receut ledit Sieur Cónestable le fleuron de toutes ses actions, mourant pour l'honneur de Dieu, seruice de son Roy, & soustien de sa patrie.

L'AN M.D.LXX. il espousa Elizabeth d'Austriche, fille de l'Empereur Maximilian, Princesse nō seulement vertueuse, mais qu'on peult iustement dire l'exemplaire de toute vertu, & principalement excellente en deuotion, rare en humilité, & toute simplicité, que chacun a estimé & estime le fleuron d'honneur de la nation Françoise, autant aimée de son Seigneur & marry, que ses pieté, chasteté, & simplicité l'en ont rendue digne: de fa-

çon que ie l'ay souuent ouy souhaiter de tout son cueur , que toutes les femmes de son Royau-  
me fussent ornees des louables mar-  
ques, dont Dieu l'auoit abondam-  
ment ornee, au plus grand conten-  
tement qu'il sçauroit souhaiter en  
ce monde.

LA paix longuement traictee à  
Longeumeau , & finalement con-  
cluë & arrestee, signee, publiee, &  
enregistree, fut de telle duree, que  
celle dōt parle le Prophete, disant:  
Il n'y a point de paix aux meschās.  
Car au mois d'Aoust certaine  
mousche piqua ces bons fideles,  
& les achemina à la Rochelle, &  
par tout le Poictou : & brief, taf-  
cherent de rechef à surprendre vil-  
les, chasteaux & forteresses, com-  
me Angoulesme, Coignac, Lusig-  
nā, Nyort, Parthenay, & plusieurs

LA VIE DV

autres, avec bonne volonté de pis faire, sans l'empeschement de la perte qu'ils feirent pres de Coignac, le neuſieme de Feurier, l'an M.D.LXIX. où Monsieur le Prince de Condé fut tué, plus trompé par la malice & cautele de ceux qui l'auoient acheminé à cela, que par autre moyé. Ceste victoire les deuoit contenter, & contraindre à pésar à eux mesmes. Mais nō pourtant. Car allechez d'vne vaine esperance du Duc des deux Ponts, qui arriua à la Charité enuiron la feste de la Trinité, amenāt quant & soy des Reistres & Lansquenetz, estans ioincts ensemble, voulurent encores tenter la fortune. Le Roy au cōtraire, aimant la paix & repos de ses subiets, les recherche par tous moyens conuenables, pour leur faire cognoistre le tort qu'ils se fai-



soient, d'offenser Dieu, & à luy si outrageusement, leur offrant toutes honnestes conditions. Mais la vengeance diuine (comme dit l'Ecriture) ne permettoit pas qu'ils vescuissent, & sembloit les poulsier au iuste payement de leurs demerites. Et qui, bon Dieu, contenteroit iamais l'insatiable cupidité des ambitieux? Certes l'experiēce de ceux cy mōstre, qu'il n'y a poit de moyē, attendu qu'il n'y a expediēt de douceur & liberalité au monde, que ce Roy debonnaire n'ait tenté & expérimenté, sans toute fois pouuoir iamais estaindre leur rage, non plus qu'on sçauroit estaindre du feu, en l'arroufant d'huile ou de graisse. La bataille de Moncōtour, qu'ils perdirent la veille de saint François audit an, & recouurement des villes, qu'ils auoient occupees au païs

L A V I E D V

de Poiçtou : les dangers eminens, où ils se veirent à la fuyte, leur dōnerent vn peu à penser, & feirent tant, qu'ils mirent, comme lon dit communemēt, de l'eau en leur vin: & se rendirent la Royne de Nauarre & Gaspard de Colligny aisez à practiquer, pendant, & souz le mariage du Roy de Nauarre avec Marguerite de France, sœur du Roy.

LE iour de la sainct Barthelemy se passe, où les principaux Chefs des entreprinſes furent chastiez selon leurs merites ( au grand regret de ce bon Roy, se voyant reduit à telle extremité, qu'il falloit ou que il hazardast sa vie & son Estat, ou qu'il eust la raison de ces Chefs:) auquel temps chacun esperoit, que les hommes de mediocre & infimie condition se rangeroient à toute modestie



modestie & obeissance, se voyans priuez de tels entrepreneurs. Au contraire, le pecheur venāt au profond de ses impietez, mesprise tout: & ainsi ces bons, tresfideles, tresloyaux & tresobeissans subiets (car tels se nommoient ils, quatorze ans y a, ou environ, en leurs Requestes) commencerent à dresser des libelles fameux contre leur Roy, & la Royne sa mere, par lesquels ils faisoient paroistre clairement la fin de leurs proiects n'estre autre, que d'acheminer tous ceux, qu'ils pourroient practiquer, à rebellion, menaçans la vie de leur Roy. Tesmoins en sont les liures de l'Alithie, Francogallia, & des fureurs Gauloises, qui sentent plus leur Tamberlan, Mahomet, ou autres leurs semblables, que leur veritable François, & moins leur Chre

LA VIE DV

stien. Tant a esté procedé, qu'ils ar-  
resterent à Milhau en Rouergue,  
tout ce qui se deuoit executer, ten-  
dant aux fins cy dessus exprimees.  
Practiquent certains personnages  
pres de la personne de leurs Maie-  
stez, pour executer leurs mauuai-  
ses affections, qu'ils pensoient exe-  
cutter à Compiègne. Mais Dieu,  
qui tient la main à la preservation  
des siens, & principalement des  
Roys, esuenta la mine de leur en-  
treprinse: si bien, que le Roy, sans  
faire semblant de rien, se retira à  
sainct Germain, aux festes de Noé,  
reuenant de Victry, où il auoit esté  
malade d'une ebullition de sang,  
qu'aucuns estimoient petite vero-  
le. Ses ennemis donques frustrez  
de leurs intentions, se deliberent  
de faire nouveaux proiects, perse-  
uerans tousiours en leur premiere

malice, qu'ils eussent assez aisémēt executez, si Dieu ne leur eust bādē les yeux. Le bon Roy estant environné de plusieurs instrumens de telle entreprinse, & allant ordinairement à la chasse, sans auoir soupçon sur personne, armé de sa seule innocence & integrité, & finalement la malice des malicieux faccroissant de iour à autre, Dieu permit que la maladie le contraignit de tenir la chambre, & les priua encores d'executer les effects de leur faction. Bien se vantoient ils par tous les endroits de ce Royaume, que le Roy ne viuroit pas plus outre que Quaresme-prenant. Cela pense-ie estre procedé de l'esperance, qu'ils auoient d'executer le coup, dont Ventabran estoit auant-coureur, ou porte-guidon, comme vn des moins aduisez executeurs

L A V I E D V

de l'entreprinse. Mais pensans surprendre, ils furent surprins : & son cousin la Mole (ieune Gentil-homme Prouençal , peu cognoissant l'honneur & grace , qu'il auoit receuë de ce bon Roy, & de Mōsieur son Frere) le deliurant, tomba en sa place, & fut mis en quatre quartiers, receuant la punition, dont il auoit exempté celuy qu'il auoit deliuré.

C H A C V N presageoit ie ne sçay quoy de malheur, depuis que ledit Ventabrā eut failly son coup, & venoiēt aduertissemens de tous costez, qu'il y auoit quelque entreprinse grande sur la vie du Roy, & de la Royne sa mere, & sur l'Estat de ceste Couronne. Sur quoy se faisoient diuers iugemens, que les presumptions extorquoient d'une part & d'autre, iusques à ce que le



premier Samedy de Quaresme, entre trois & quatre heures, leurs Majestez eurent aduertissement, qu'il y auoit de quatre à cinq cens cheuaux nō gueres loin de Poissy, qui venoiēt effectuer sur leurs autoritez & vies quelque malheureuse entreprinse. Et fault bien dire, qu'ils n'auoient pas faulte de fauteurs, ayans eu le moyen d'acheminer leur entreprinse si auant, sans que leurs Majestez en eussent aduertissement. Que s'il y auoit aucun, qui meu de bonne affection, en feist sentir quelque chose, il est à presumer, que les instrumēts cachez en Cour (q̄ depuis se sont vn petit plus clairement faits cognoistre) iettoient cela si loin, que la plus part y adioustoient, ou peu, ou point du tout de croyance, iusques à ce que la mesme necessité y

LA VIE DV

contraignit les plus difficiles à persuader, & fallut qu'une grãde partie de la Cour marchast de nuit pour se retirer en la ville de Paris. Je vous laisse à penser les passions & angoisses, que le bon Roy enduroit en vn esprit genereux, dont Dieu l'auoit doué : combien d'agitations il souffroit en son cueur, se voyant d'une part aggresse de si pres par ces mescreans heretiques & rebelles, & d'autre part si mal secondé en ses bonnes affections, par ceux qui deuoient veiller sans cesse sur la seureté de sa vie, & protectiõ de ses subiets, desquels aucuns estoient consentans à tel malheur, comme ils ont depuis fait paroistre. O grande cruauté ! cruauté certes Scythique, & plus que barbare.

L'ENNEMY a esté si tresgrand au

cueur du Roy CHARLES le debonnaire, que finalement, apres s'estre retiré à Paris, & de Paris au Bois-de-Vincēnes, la maladie qu'il auoit en ses poulmons, se rengregea, & accompaigné d'un foye alteré, & mal attrempé, receut vne inflammation si grande & vehemente, que les effects ont fait paroistre. Ce pendant les heretiques se promettoient, qu'il ne viuroit plus outre, que du mois de May: tesmoin la Nouë, qui le dist à Monsieur Prothesius, Prouincial de l'ordre saint François, qu'il auoit fait prisonnier en la ville de Fontenay, & qu'il traitoit à la mode que les Tyrans ont accoustumé de long temps de traiter les bons Chrestiens, & principalement les hommes rares en vertu & sçauoir, comme chacun sçait estre ledit Prothesius. De

LA VIE DV

là plusieurs du vulgaire coniecturerent, qu'il y auoit du poison meslé à la maladie du Roy. Et, à dire vray, il y auoit argument de penser l'un des trois, ou poison, ou art diabolique, ou intelligence avec ceux, qui auoient eu le moyē de cognoistre la maladie du Roy, & en donner quelque resolution.

LE Roy donques detenu en l'anguer tous les mois de Feurier, Mars, Aupil, fit consulter de sa maladie : & par telles consultatiōs fut aduisé, qu'il seroit saigné & purgé : ce que fut executé, mais en vain : car ses forces diminueoient à veuē d'œil, & le voyoit-on descroistre, pressé d'une courte haleine, qui l'a accompagné iusques à la mort.

Si ne cessoit-il pourtant de veiller sur son pauvre Royaume, s'en faisant paroistre si soucieux, cōme  
si sa



si sa santé eust peu luy permettre le  
maniemēt de ses affaires. Vray est,  
que la prudence laborieuse de la  
Royne sa mere portoit pour luy  
ioyeusement la pesanteur de tout  
le fardeau, comme elle a fait paroî-  
stre souuentefois depuis les trou-  
bles aduenuz en France, mais plus  
particulièrement, & avec vne rare,  
voire admirable constance, depuis  
le iour du Ieudy absolu, huietieme  
d'Auril: Auquel temps elle tira de  
la bouche de la Mole la plus part  
de ce qui auoit esté caché. Depuis  
lequel temps elle a conduit le tout  
auec vne sagesse si rare, qu'il n'y a  
celuy, voire mesme d'entre les en-  
nemis de la Couronne, & les siens,  
qui ne soit contraint de confesser,  
qu'elle est conduite de l'esprit de  
Dieu, pour la voir vser d'office de  
vraye mere, tant enuers Monsieur,

son fils, qu'enuers le Roy de Navarre, que les ennemis eüssent volontiers trāsferéz de leur costé (nō tant pour respect qu'ils leur portent, que pour abuser de leurs grādeurs & auctoritez) pour souz leur ombre mettre fin à leurs desseins, possible à leur grand preiudice, apres s'estre seruiz d'eux à l'executiō de leurs passiōs. Et quelle loyauté se pourroit on promettre de ceux, qui faussent la foy à leur Dieu, à leur Roy & Prince naturel, & à leur patrie? C'est pēser tirer des raisins des espines, comme dit l'Euangile, que d'auoir opiniō, qu'un desloyal rende iamais office de loyauté.

EN cela donques a elle fait paroistre la generosité de son esprit, & sa grande dexterité: à fin que ie taïse, combien heureusement elle conserue, outre l'expectation de

plusieurs, qui se craignoient d'une pire saison, le repos & la tranquillité de la ville de Paris, & de plusieurs Prouinces de ce Royaume. Mais pour autant que nous auons touché le propos de la Mole, il sera bon de l'esclaircir vn petit plus auant, pour les actes de consequence qui en dependent.

LA Mole donques fait prisonnier le Vendredy oré, & conduit à la Conciergerie à Paris, interrogé par les Iuges à ce deputez, & le proces instruit, fut condamné à mort, pour auoir seruy de mauuais instrument aux mescreans, & rebelles heretiques : Ioinct au Comte de Caconas, cōdamné à mesmes peines, pour mesmes crimes. Moy estant aduerty de leur iugement, par le commun bruit qui en estoit, ayant commiseration de ceux, qui

faifans profefſion de Catholiques, ſ'eſtoient tant oubliez: les cognoiſſant du nombre des ouailles de mon auditoire de la Cour, où ie preſchois ordinairement, voulant leur rendre le dernier des offices de ma charge, ſçauoir les exhorter à bien mourir, puis que le malheur auoit porté, qu'ils n'auoiēt ſi bien veſcu, que le deuoir requeroit: Ie les allay trouuer à la Chappelle de la Conciergerie, attachez à deux anneaux, chacun d'un coſté de ladite Chappelle, comme hommes ſequeſtrez à la mort. La Mole me voyant, ſ'eſcria à haulte voix, avec abondance de larmes: Ah, Monsieur de Sainte Foy, que ne vous ay-ie cognu plus particulièrement, & que n'ay-ie obey à voz ſainctes admonitiōs, qui m'euffent gardé de tomber en ce malheur! Finalement me pria de



m'asseoir aupres de luy, & le consoler. Ce que ie promis faire tres-volontiers, & me mis en deuoir d'effectuer, luy proposant deuant les yeux, & la mort ignominieuse de Iesus Christ, & son innocence, qui doit contraindre tous les Chrestiens à porter patiemment la mort, qu'ils ont iustement meritee pour leurs fautes & demerites. Entre autres choses les exhortay tous deux, de vouloir, en satisfaction de leurs pechez, aduiser en quelle facon ils pourroient faire seruice à Dieu, qui luy peust estre agreable, tant en descouurant les coupables de tel malheur, qu'en dischargeant les innocens. Ce qu'ils feirent, le Comte de Caconas y acheminant par force de remonstrances ledit la Mole: qui en la presence des Magistrats, & plu-

sieurs autres, me requist d'en donner aduertissement à leurs Majestez, pour l'honneur de Dieu, & cōseruation de l'Estat.

REVENANT dōques à la maladie du Roy, qui s'augmētoit d'un iour à autre, ses forces se diminuoient, & estoit detenu en langueur extreme. Le iour de la Pentecoste, estant pres (auquel temps vint la nouuelle de la prinse du Comte de Montgommery, prins à Damfront par Monsieur de Matignon, & plusieurs autres grands Seigneurs, & braues guerriers, poursuyuās mesme entreprinse) le bō Roy se delibera faire sa Pasque, & gagner le Iubilé, que nostre S. Pere, Gregoire XIII. auoit ottroyé, pour semondre tout chacun à faire prieres pour la paix & repos de l'Eglise, extirpation des heresies, prin-

cipalement au Royaume de France, & contre les entreprinſes du Turc. Le iour fuſdit, à huit heures, Monſieur Amiot, Eueſque d'Auxerre, & Grand-aumofnier de France, & moy, entraſmes en ſa chambre, & le trouuaſmes en ſon liſt, pleurant les pechez, qu'il auoit par fragilité commis, qu'il confeſſoit eſtre vrais fondemens de l'ire de Dieu ſur luy & ſur ſon peuple. Dequoy chacun loua Dieu, l'exhortât à biẽ eſperer, puis que Dieu le fauoriſoit tant, que de luy donner ſi grande contrition de ſes pechez, & vne volonté de mieux le ſeruir, aduenant qu'il receuſt la ſanté.

DESLORS remis & repatrié par tant de conſolations, que chacun ſeſtudioit de luy propoſer des ſainctes Eſcritures, cõme des exẽ-

L A V I E D V

ples d'Ezechias, Manasses, & d'autres, desquels les larmes & vraye penitence furent les moyens pour appaiser l'ire de Dieu, & leur obtenir accôplissement de leurs saints desirs: il commanda à chacun de se retirer au Cabinet, & à moy de m'asseoir au cheuet de son liêt, tât pour ouyr sa confession, & luy donner ministerialement absolution de ses pechez, que aussi pour le consoler, durant & apres la Messe, luy parler propos de Dieu. Ce que ie me meis en deuoir de faire du mieux que ie peuz, non sans endurer extremes passions en mon cueur, voyant ce piteux Prince insatiable à m'ouyr parler des diuins mysteres Eucharistiques, de leur vertu, de la foy, esperance, & charité, requises à la participation d'iceux, de la preparation de la conscience, par  
contrition



contrition de cueur, confession de bouche, & satisfaction du mieux que faire se peult, depositiō de malice, & propos de vengeance des iniures priuees.

LA confession faite, & l'absolution conferee, Monsieur d'Auxerre se meit à l'autel, celebra les diuins mysteres deuotement: Et ie vous laisse à penser, avec combien de larmes & de pleurs, voyant ce bon Roy, qu'il auoit institué & à la pieté, & aux bonnes mœurs, & cognoissance des lettres, si pres de la mort, pressé d'une courte haleine, la plus fascheuse qu'on sçauroit voir: Finalement luy administra il le corps de Iesus Christ: auquel il participa avec larmes, regret de ses pechez, & ioye spirituelle, se voyant vny par reale participation à celuy Sauueur, qui est mort en

L A V I E D V

vne croix , pour viuifier nostre mortalité en sa vie.

ON luy auoit apporté vne Couronne , de celles qu'on est cousturier de faire mettre sur la Chasse sainte Geneuiefue, qu'il desira luy estre appliquee sur sa teste , me commandant ce pendant de dire à son intention, l'Oraison de sainte Geneuiefue . ce que ie feis tres-volontiers. Cela fait, on luy donna quelque peu de gelee & de restaurant pour le fortifier . Toutefois il cognoissoit, que sa courte haleine le pressoit de plus en plus. La Royne mere pendant ce temps entra en sa chambre , suyuite de Monsieur le Chancelier , Noble de Birague, Seigneur dextrement & heureusement versé au maniement des affaires de ce temps : Lequel remonstra au bon Roy , que d'autant que

sa maladie empeschoit, qu'il ne pouuoit entendre à plusieurs affaires, où sa presence seroit bien necessaire, il seroit bõ, qu'il luy pleust donner auctorité de Regence à la Royne sa mere. Auquel propos le Roy, qui auoit le iugement gentil & adextre, cognut euidemment, avec les marques qu'il en sentoit par son indisposition, le doubte qu'on faisoit de sa vie. Declara deuant tous, que sa volonté estoit, que la Royne sa mere eust l'auctorité de Regente. Feit venir Monsieur le Vicomte d'Ochi, & autres Capitaines de ses Gardes, tant Souyffes, qu'autres, ausquels il dist: Faites tout ce que Madame ma mere vous cõmandera, & luy obeissez comme à moy-mesme.

Je le louïay de toutes mes forces, de la magnanimité & constance,

L A V I E D V

qu'il auoit euë, sans faire paroistre, ny regret qu'il eust à ceste vie mortelle, ny crainte tāt fust petite de la mort. Mesmes peu de temps apres reprenāt le propos à la Royne sa mere, à laquelle il se declara resolu à la mort, prest à receuoir la volonté de Dieu, entre les mains duquel il se croyoit estre: Vienne (dist-il) la mort quand Dieu voudra, Madame, ie suis prest & appareillé à receuoir la volonté de mon Dieu. Vne priere ay-ie à vous faire, sçauoir qu'il vous plaise continuer les bons offices ja dés long temps commencez par vous à l'endroit de ce pauvre Royaume, & vous prie biē affectionneement faire iustice des perturbateurs du repos d'iceluy, Dieu vous les mettant en main. Mais ie vous en prie, Madame, biē affectionneemēt. Lesquels propos



procedoiēt d'un zele, qui sembloit surpasser l'aage d'un si ieune Prince, & qu'il prononça sans tirer larme d'œil, avec vne magnanimité & constance indicible. La Royne sa mere ne peut se contenir de pleurer, comme ne firēt aussi tous ceux qui estoient presens. Elle finalement faisant de necessité vertu, le consolait des consolations, qu'une bonne mere exploree peult produire envers son enfant, qu'elle voit constitué en telle extremité.

QUEL CUN a eu opinion, que la Royne regnante, sa femme, le vint voir le iour de sa mort, & pria Dieu quant & luy: mais non feit, sauue sa paix, on l'en a mal instruit. Car commēt seroit il possible, que deux cueurs si estroictement conioints en amitié, pour les rares & singulieres vertus de pieté, bonté,

& douceur, dont ils estoient si également ornez, qu'il n'y eut iamais matrimoniale conionction, pour telles & autres raisons, si estroictement cōiointe, q̃ celle là, eussēt peu auoir humainement le moyē de ce faire en telle necessité, sans endurer vne douleur plus grande, qu'innies morts ensemble? Chacū doncques cognoissant le trespas du Roy approcher, s'estudia de rompre la deliberation de la Royne, sa femme, qui n'auoit pas faulte de volonté de luy assister, comme elle auoit accoustumé les autres iours, desquels elle employoit vne grande partie, & des nuicts avec, pour dōner & à l'vne & à l'autre partie d'entre eux deux, ce contentement de s'entreuoir, & protester par mutuels regards la commune sympathie, qui possedoit leurs cueurs &

leurs ames. Pour ce iour donques l'ayant seulement veu, elle vacqua à se confesser, faire sa Pasque, & multiplier les prieres assidues à l'Eglise ou Chappelle du Bois-de-Vincennes: où elle ouyt Vespres, à la grande admiration de tous les spectateurs: & pense qu'elle estoit en prieres & oraisons en ladite Eglise, lors que l'ame de son Seigneur & mary deslogea de ce monde pour aller à Dieu. Nous parlerons de sa constance & fermeté, quand l'occasion se presentera.

LE Roy donques sur le Midy me commanda de vouloir sans cef se continuer les propos que ie luy auois commencez, propos pleins du mespris de ceste vie terrestre & transitoire, & des louanges de la vie celeste & eternelle. Et me souuiant, qu'entre autres propos ie luy

L A V I E D V

propofay deuant les yeux la requēte pleine de toute prudence & modestie, que les Maries, Martre & Magdeleine, feirēt à Iefus Christ absent, au temps de la maladie de leur frere. *Ecce, quē amas, infirmatur:* Voicy, celuy que tu aimes, est malade. Là ie luy propofay les marques d'amour & dilectiō, que Dieu luy auoit monstrees depuis fa naissance, & principalemēt depuis son aduenement à la Couronne, le preſeruant premierement de tomber en hereſie, par la vertu & grace qui luy fut conferee à ſon Sacre, comme chacun d'entre les bons Chreſtiēs a touſiours creu, croit, & croira à iamais. Ie luy propofay deuant les yeux tant de belles victoires, que Dieu luy auoit donnees, pour auoir eſté protecteur & deſenſeur de la foy & Religion Catholique.

Ie luy



Je luy representay d'abondant les grandes marques d'amour & dilection, que Dieu luy auoit mōstrees aux admirables descouuertes de tant de coniurations, que les mescreans heretiques auoient depuis quatorze ans, ou enuiron, industrieusement brassées cōtre sa vie, celle de la Royne sa mere, du Roy son Frere, à present regnant, & de plusieurs autres Princes, Seigneurs, & fideles seruiteurs siens, amateurs de la conseruation de la foy, & Religion Catholique, & de l'Estat de ce pauvre Royaume. Adiurez (dis-ie) & requerez Iesus Christ, par icelle sainte amitié, qu'il vous a portee, d'auoir esgard à vostre infirmité, conduire le tout selon sa sainte prouidence, vous donner la constance & fermeté, pour porter la croix, qu'il luy a pleu vous met-

tre sur voz espaules.

PENDANT le temps qu'il prenoit vn fouuerain plaisir à ouyr parler de tels & semblables propos, on sonnoit le Sermon en la Chappelle dudit Chasteau: où vne grande quantité de peuple estoit assemblee, attendât la predication, pour la solénité du iour. Ce que ie luy feis entendre doucement, pour sçauoir sil trouueroit bõ, q̃ i'y allas se rēdre le deuoir pour vne demie heure. A quoy il respondit benignement: Allez, reuenez icy le plus tost que pourrez. Ce que ie feis, nõ sans faire entendre à mon auditoire, par periphrases & circumlocutions, la necessité où nostre bon Roy estoit constitué, & nous en luy, indignes certes de sa tant piteuse, genereuse & doulce presēce. Reuenant en sa chambre, ie le re-

trouue plus abbattu & debilité de  
ses forces naturelles, qu'au passé,  
l'haleine bien courte, & luy aspirāt  
du tout à Dieu: suppliant la Roynes  
sa mere, d'enuoyer promptement  
querir le Roy de Polōgne, son Fre-  
re, à present Roy de France, qu'il  
regrettoit & pleuroit infiniment,  
pour le voir si loing de ce Royau-  
me, & par mesme moyen cognoi-  
stre le danger, où estoit posée sa  
Couronne. Mais, Dieu mercy, la  
pieté, prudence, & fermeté de la  
Roynes sa mere, à present Regente  
en France, a conduit le tout avec  
vne sagesse & magnanimité si grā-  
de, qu'il n'y a celuy, qui n'admire  
en elle les graces que Dieu luy fait.  
Et est entre autres vn acte remar-  
quable, qu'elle a fait au chastiemēt  
executé par auctorité de iustice, en  
la personne du Comte de Montgō-

L A V I E D V

mery , premier Chef des rebelles contre Dieu & le Roy , qui fut decollé en la ville de Paris, en la place de Greue , deuant la maison de la ville , le Samedy vingtsixieme du mois de Iuin , en la presente annee M.D.LXXIIII. Et vainquit heureusement sa Majesté l'opinion de la plus part du monde, qui pensoit le dit Montgōmery ne deuoir mourir par iustice, ains deuoir estre conserué, pour seruir d'entremetteur & instrument au recouurement des places occupees en ce Royau-me, ou autres negociations pour les guerres ciuiles, qui l'oppriment. Mais ie vous prie, où est la cōsideration, que la vertu n'abbatte ? la vertu, dis-ie, qui conuoite les périls & les dangers, qu'elle ne prefere iamais à la fin, où elle tend & aspire ?

C E L A fait, la Royne sa mere



s'asseit sur vn coffre,accompaignee de Messieurs les Cardinaux de Bourbon & d'Est, Princes bons & vertueux, comblez de toute tristesse, de voir le Roy en si grande necessité. Quant & eux aussi estoient Monsieur de Birague, Chancellier, Mōsieur de Lāsac, & plusieurs autres grands Seigneurs, spectateurs du trauail, où le pauvre Roy estoit cōstitué: lequel Monsieur Amiot, Euesque d'Auxerre, & Grand-aumosnier de France (homme certes rare & excellent, pour ses pieté, integrité, & doctrine singuliere) comença à entretenir de saincts & doctes propos, prins des sainctes Escritures: mais non sans larmes & pleurs, pour se voir, humainement, priué de la presence de si bon Prince, qu'il auoit nourry dés le berceau, & à l'endroit duquel il auoit

tant acquis de bonne reputation, que outre ce qu'il l'appelloit tousiours, Mon maistre, encores tenoit il tous ses conseils & aduis comme oracles, ou propos procedans de la bouche d'un saint & veritable Prophete. Ledit Sieur Amiot luy demāda, s'il n'auoit pas aggreable, que ie luy interpretasse les Articles de la Foy, compris aux Symboles de l'Eglise Catholique. Ce qu'il trouua tresbon, repetant, comme ie luy discourois en forme de paraphrase sur lesdits Articles de la Foy, qu'il viuroit & mourroit là dessus. Particulierement luy interpretant l'Article, par lequel nous confessons croire vne sainte Eglise Catholique & Apostolique, il declara auoir en horreur les Eglises partiales des Lutheriens, Anabaptistes, Caluinistes, & autres

sectes & heresies, qui au mespris de  
 l'Eglise vniuerselle, ont fait logis à  
 part, bandé autel contre autel, &  
 sacremens contre sacremens: brief, Rom. 13.  
Galat. 3.  
Ephes. 4.  
 fait effort de diuiser Iesus Christ,  
 qui n'est qu'un avec son espouse.  
 Toutes ces choses protesta-il croire,  
 de telle façon & maniere, qu'on  
 scauroit attēdre & esperer d'un Roy  
 treschrestien. Apres la ptestation de  
 la Foy, Mōsieur d'Auxerre luy feit  
 entēdre, cōbiē estoit salutaire, prin-  
 cipalemēt en l'ame, & encores aux  
 maladies corporelles, l'vsage du  
 Sacremēt de l'extreme onctiō, luy  
 mettant deuant les yeux la senten-  
 ce de sainct Iaques, promettant,  
 l'oraison de Foy faite sur le ma-  
 lade par les Prestres de l'Eglise, sau-  
 uer le malade de l'infirmité corpo-  
 relle, & luy obtenir remission de  
 pechez. Luy demanda, sil ne desi-

roit point que ce Sacremēt luy fust administré. A quoy il respondit, Ouy : mais hastez vous, mon maistre. Et fallā disposer ledit Sieur Euesque d'Auxerre, pour luy administrer : mais la mort le preuint. Car peu de temps apres, sentant la mort approcher, ayant demandé vn peu de restaurāt pour la derniere fois, qui luy fut promptement baillé par Messire Charles de Gondy, Cheualier de l'Ordre, & Maistre de sa Garderobbe (qui pour tesmoigner l'estroicte amitié qu'il portoit à son maistre, grand dueil, & extreme regret qu'il auoit à sa mort, est mort en moins de trois sepmaines apres) & soudain supplia la Royne sa mere, de luy pouoir dire Adieu, pour la seconde & derniere fois. Ce qu'il feit, l'embrassant, & baisant tendrement, apres



apres l'auoir exhortee de ne pleurer, & de ne se cōtrister de sa mort, luy disant, Adieu Madame, & Adieu ma mere: Paroles si trespiteuses, qu'il n'y auoit celuy des spectateurs, qui ne fondist en larmes, le seul cueur de ce Prince demeurant indomtable & inflexible, sans iamais varier, ny pour la crainte de la mort, ny pour le regret, que Nature poulse chacun à auoir aux choses, qu'on a les plus aimees ça bas. Et n'y eut iamais Socrates, ny Stoique, tant fust il resolu, qui d'une face plus constante & ferme trespaslast de ce mode en l'autre. Soudain vn petit plaint, vray auant-coureur de la mort, le surprint, durāt lequel il reïtera par diuerses fois ces paroles, *Et Dieu me mette au nombre de ses esleuz*. Je prins ces propos, & le mieux qu'il me fut possible, com-

blé de la douleur, qu'un naturel subiect, & veritable seruiteur, peult & doit auoir voyant son Roy, & Prince naturel, & son bon maistre, reduit à telle extremité, taschay à cōfirmer en luy l'esperāce qu'il deuoit auoir d'estre en bref aggregé au nōbre des esleuz de Dieu: luy amenant sur ce propos les ombrages, qui en l'ancienne Loy peuuent auoir adombré ce que le Messie & Sauueur du monde a accomplý, pour mettre au nombre des siens ceux, qui mourans en la Foy de l'Eglise, esperent en luy, ornez d'une charité viue, tant enuers Dieu que leur prochain. Entre lesquelles figures, ie luy proposay celles de Moýse, Iosué, & de Samson: celle principalement du Serpēt d'airain, laquelle nostre Seigneur mesme nous a interpretee. Et pour corro-

borer en luy l'esperance treschrestienne, ie l'excitay, le mieux qu'il me fut possible, à se presenter deuant la face de ce grand Pasteur de noz ames Iesus Christ, comme vne pauvre ouaille, non esgaree de la Foy, mais bien de la gloire de l'Eglise triomphante, à l'associatiõ de laquelle tout bon Chrestien doit aspirer de toutes ses forces. Lesquels propos le bon Prince escoutoit avec vne auidité si tresgrande, que ses yeux ouuers & tendus vers moy, protestoient à chacun, combien il estoit desireux d'abandonner ce logis terrestre & temporel, pour estre conioint à celuy, pour la Foy & Eglise duquel il auoit enduré tant de guerres, tribulations, persecutions, coniuurations & trahisons, contre sa vie & son Estat. Et me craignant, qu'il n'entendist pas



LA VIE DV

clairement mes exhortations, le voyant bien pres de sa fin, ie luy demanday, Sire, m'entendez vous pas bien ? A quoy il respondit clairement, Ouy. Et bien peu apres, suruenant vn doux sommeil, l'ame deslogea de son tabernacle terrestre: le deslogement de laquelle fut exprimé par deux ou trois petits souspirs, sans que le bõ Prince feist semblant d'endurer passion quelconque en vne separation si triste, si grande, & qui de tout temps a esté si formidable. Et qui est celuy (disoit le profane Ciceron) de qui la mort approchant, le sang ne se retire, & qui ne pallisse de peur? Mais ce genereux & debonnaire Prince en cela a fait paroistre, que la sincerité de sa foy, & fermeté de son esperance, surmontoit en luy l'ordre naturel. Car estât trespasé,



sa face estoit plus belle, qu'elle ne  
souloit estre auant qu'il trespassast,  
& non à la mode des hommes de  
mauuaise foy, & pire conscience,  
desquels apres la mort le visage  
demeure affre, hideux, & desfiguré:  
Non toutefois que tous ceux qui  
ont ces traicts apres la mort, doiuent  
estre iugéz pour hommes de mau-  
uaise conscience: mais bien au con-  
traire, ceux qui à contrecueur, &  
auec vne conscience mal disposee  
sortent de ce monde, laissent enco-  
res en leurs visages quelques  
traicts de leur interieure indisposi-  
tion. Telle a esté la fin de ce Roy  
genereux, de qui l'ame a esté si bel-  
le, la vie si genereuse, & ornee de  
toutes vertus, que le succez & der-  
niere fin ne pouuoit estre autre,  
que correspondante aux actions  
de vertu, dont elle a esté precedee.

La mort ne doit estre iamais estimee mauuaise, qui est precedee d'une glorieuse vie. C'est ce que le vulgaire a accoustumé d'exprimer, disant : De bonne terre bon topin, & de bonne vie bonne fin. Et à fin que ie n'omette rien qui puisse appartenir à la description de ses mœurs, conditions, qualitez, & autres choses dignes d'estre marquees, nous parlerons premiere-ment de la descriptiō de sa forme: secōdemēt, de ses louables mœurs, de ses propos, & principales actiōs: & finalement des choses memorables aduenues soubz son regne.

Premieremēt, c'estoit vn Prince beau, & grād, pour l'aage de xxiiij. ans non encores accompliz, autant qu'autre qu'on sçauroit voir en ce Royaume, ressemblant à son ayeul François premier en cela: le visage

beau, & principalement les yeux, entre lesquels y auoit grande & belle distance: le nez grãd & beau: brief, vn visage, qui protestoit vne graue simplicité, & vne simple grauité, sans arrogance, sans faste, & sans orgueil, sa face ridee autāt pour les ennuis qu'il a tousiours portez, que pour ses excessifs exercices. Sa cheueleure estoit assez rare en la teste, mais assez abõdãte en la barbe qui approchoit de la couleur de chasteaigne. Telle couleur donnēt les anciēs Escriuains à la cheueleure du Roy des Roys Iesus Christ. Il auoit les mains belles par excellence, larges, les doigts longs: & le faisoit singulierement beau voir faire le signe de la Croix, ores qu'il touchoit les malades: vne des actions, ausquelles il se plaisoit excellentement, comme il faisoit aussi



au seruice des pauures, le iour du Ieudy absolu: Auquel iour chacun le voyoit si allegrement, & avec vne si rare deuotiō seruir aux pauures, qu'il estoit assez aisé à iuger, quel estoit le contentement & religieux plaisir qu'il y prenoit. Le reste de son corps estoit assez bien proportionné. Il auoit seulement les iâbes vn peu debiles, ou moins grosses, eu esgard au reste des proportions superieures de son corps. Aquoy aussi aydoit sa valetudinaire indisposition, qui estoit si tres-grande, qu'à peine le voyoit-on vn seul mois sans estre indisposé.

S E S mœurs estoient les plus doulces du mōde. Il aimoit la paix & repos de son peuple, & ne desiroit rien en ce monde, que de voir ses subiets reüniz en la foy & religion de l'Eglise Catholique, pour  
faire



faire paroistre à chacun, quelle estoit sa generosité, & combien digne il estoit de regner en vne meilleure saison, que celle, où la malice d'aucuns d'entre ses subiets le tenoient engagé, le priuans, luy, & ses pl<sup>9</sup> fideles subiets & seruiteurs, d'une beaucoup meilleure, & plus heureuse, qu'on eust à bon droit peu dire le siecle d'or.

CAR qu'y a il au mode de vertueux & de bon, dont il n'ayt esté amoureux? Premièrement, il auoit le cueur vraiment religieux, & treschrestie, encores qu'il n'en feist pas si grande demonstration deuant les hommes, que chacun eust bien souuent desiré. Il aimoit tousiours à ouyr la parole de Dieu, où ie l'ay infinies fois veu si ardent, que chacun voyoit l'auuidité de son cueur par ses gestes & mouuemens exte-

LA VIE DV

rieurs, qui faisoient paroistre, combien le fil de l'oraison, les excitations, & exaggerations de celuy qui preschoit, auoient de pouuoir en son cuer. O combien de fois m'a il exprimé de bouche l'aïse & le contentement qu'il receuoit, entendant rabbatre les erreurs de ce temps, avec des raisons soluables, & des responses dextrement colligees des Escritures saintes ! qu'il comprenoit si promptement, & avec vne telle dexterité, qu'infinites fois i'ay esté contraint de l'admirer en moy-mesme. Il auoit le iugement sain & asseuré, quãd il entreprenoit à iuger volontiers de quelque chose, dont il auoit l'intelligence.

QVE fil parloit à quelcun, c'estoit tousiours sans confusion de propos, & selon la profession de

celuy à qui il parloit. A vn Theologiẽ, de la parole de Dieu, non de questions curieuses, mais du tout Chrestiennes, & d'edificatiõ, tendãt tousiours à l'extirpation de l'heresie, qu'il hayssoit mortellement. A vn Poëte il parloit tousiours de poësie, à vn guerrier, des armes, des combats, des stratagemes, ruses & cauteles de guerre: à vn Architecteur, des instrumens, ou des reigles de l'art, qu'il auoit en prompt: parlãt presque de tous les arts mechaniques, comme si de tout tẽps il en eust fait profession. Trouuoit fort estrange, qu'aucun luy parlãst resoluẽment hors de son mestier, estimant malaisé à vn homme, de iuger certainement de ce, dont il ne faisoit estat: comme au contraire, vn des plus grands contentemens qu'on luy sçauoit donner,

estoit, que chacun luy parlast de  
ce à quoy il le cognoissoit habile.

EXTREME estoit il vn petit en  
exercice & violéce. Il aimoit quel-  
quefois à forger, & auoit ses for-  
ges, tant au Louure en Paris, qu'à  
Amboise. L'exercice des armes luy  
plaisoit infiniment, & sur toute  
chose la chasse du Cerf, où il se plai-  
soit si extremement, qu'il n'y auoit  
moyen au monde de l'en distraire.  
Et me viét en memoire, qu'vn cer-  
tain iour à Chasteau-briât en Bre-  
tagne, ie fus cōmandé par la Roy-  
ne sa mere, de luy remonstrier les  
inconueniens qui luy pouuoient  
aduenir pour s'adonner par trop à  
tel exercice. Ce que ie feis tref-vo-  
lontiers en son Cabinet, Monsieur  
le Comte de Rets, à present Mares-  
chal de Frâce, seul tesmoin de mes  
remonstrances. Mais ie n'ouys ia-



mais homme mieux discourir de  
 la distribution & departement de  
 ses actions, pour me persuader &  
 faire croire, que le plaisir qu'il pre-  
 noit à la chasse, ne portoit preiudi-  
 ce en façon du mode, ny à la santé  
 de son corps, ny au deuoir de sa  
 charge: où il me fait paroistre, cō-  
 bien il estoit eloquent & facond,  
 comme de vray il estoit.

S O B R E estoit il en son mäger  
 & boire, peu curieux de sa nourri-  
 ture, moins superbe en habits que  
 autre de sa Cour: & se desplaisoit  
 infinimēt à voir la curiosité d'au-  
 cuns vrais singes de Cour, se pei-  
 gnans, coueffans, & habillans à tou-  
 tes les modes qui se presentient  
 deuant leurs yeux, tantost à l'Ita-  
 lienne, tantost à la Pollaque, peu  
 apres à l'Allemande, & autres tel-  
 les manieres d'ornemens. Sur tout

LA VIE DV

luy desplaisoient en ces derniers iours les hōmes empesez, desguisez en leur cheuelure, fust en la barbe, ou au reste des cheueux de la teste. Extremement hayssoit le fard, & l'ornement des rattepenades. Que dis-ie ornemēt? mais plus tost desbordement infame & des-honneste, inuenté, comme ie croy, par quelque curieuse, ou Payenne du tout. Et qu'est il au monde de plus falle, & moins sentant sa femme Chrestienne, que de voir sa teste ornee des cheueux d'autrui, quelquefois d'un trespasse, possible teigneux, ou teigneuse, quelquefois pourroit estre ladre, ou ladresse? Le bon Roy donques hayssoit cela, comme vn crime ennemy de nature, effaceant, ou desbordant du tout les veritables & naifs effects d'icelle. Aimoit la Roynes sa

femme, pour la voir naifue ( entre autres vertus qu'il honoroit en elle) non curieuse, & ennemie de tels ornemens, ou pustoit desbordemens. Aimoit la Poësie, & bien souuent prenoit plaisir à faire des vers, qu'il enuoyoit à son Poëte Monsieur Ronfard, homme qui se fait plus paroistre par ses vertus, & doctes vers, que ie ne le scaurois descrire: de qui la facture luy estoit si agreable, que bien souuent il passoit vne grand partie de la nuict à lire, ou faire reciter ses vers: A quoy il employoit volôtiers Amadis Iamin; Estienne le Roy, Abbé de S. Laurent, Maistre de la Musique de sa chambre, & quelques autres de ses seruiteurs domestiques. Et non seulement prenoit plaisir à ouyr la Poësie bien faite, ains auoit encores l'esprit si gentil, qu'il



LA VIE DV  
en iugeoit fort heureusement.

DIEU, qu'il aimoit la Musique, fust aux instrumens, ou aux voix humaines ! Et sur tout luy estoit agreable la Musique, principalement celle d'un des plus rares Musiciens de ce temps, nommé Orlāde, seruiteur au Duc de Bauieres: de qui la Musique luy plaisoit si tres-tant, qu'à peine en pouuoit il goustier d'autre, pour luy estre de tous poincts agreable. Entre toutes les voix il aimoit celle de Maître Estienne le Roy, Abbé susdit de saint Laurent, qu'il cherissoit vniquement, & constituoit iuge de tout ce que se presentoit de bon en Musique. Et non en vain, à dire vray. Aussi est il vertueux, & aimable, doué de la plus belle voix de nostre temps, & du plus adextre vsage d'icelle.

Aimoit



AIMOIT sur toutes choses les hommes entiers & veritables, principalement ceux qu'il cognoissoit zelateurs en la Religion Catholique: ausquels il descouuroit volōtiers son cueur, leur faisant cognoistre par ses propos, combien il desiroit de voir Dieu honoré, & bien seruy en France, & l'heresie desracinee. Hayssoit les mēteurs, hypocrites & dissimulez: sur tous, les heretiques, qu'il voyoit mal aisément & à contre-cueur, seulement pour les sçauoir ennemis de Dieu: outre ce qu'il les cognoissoit peu affectionnez à son seruice, cōme leurs actions ont par trop clairement fait paroistre.

V N certain iour estant en la ville d'Angers, quelcun de ses seruiteurs domestiques pensa luy faire grand plaisir, luy discourant du re-

LA VIE DV

gret que chacun auoit, que l'exécution de la bataille de Moncontour n'auoit esté poursuyuie, la plus part des hommes pensant, que c'estoit le droict moyen pour mettre fin aux troubles de son Royaume. A quoy il respondit, que la plus part de ceux, qui parloient de ces succez là, en parloient, comme lon dit, en clerks d'armes, & qu'il estoit marry extremement, de voir de tels, qui se disent ses seruiteurs, n'aimans rien moins que son seruice, & s'estudiâs de toutes leurs forces de rompre l'estroicte amitié d'entre luy & son frere, le Roy Henry troisieme, à present regnant : l'alteration de laquelle, tant fust petite, ne luy seroit moins fascheuse que la mort, tant il l'aimoit vniquement. A déclaré souuēt, que sondit frere estoit

digne d'estre Roy : qui estoit desja predire ce qu'il a pleu à Dieu depuis effectuer. Il se monstra si eloquent & copieux en ce discours, & plein d'une si grande ardeur d'amitié, qu'une grande partie des assistans l'escoutoient attentiuemēt la larme à l'œil : & tous ensemble admiroient l'eloquēce de ce ieune Prince, qui à peine auoit atteint l'aage de vingt ans.

QUELQUES iours avant son trespas arriua vn Ambassadeur d'Angleterre: lequel luy faisant entendre la volōté qu'il auoit de luy exprimer sa charge, soudain se leua, print sa robbe de chambre, & se coucha sur vn liēt verd qu'on luy auoit dressé, pour se reposer aux apres-disnees: Où il escouta attentiuement le discours dudit Ambassadeur, qui ne dura gueres moīs

de trois quarts d'heure. A la fin duquel il reprit le propos, respondit, de poinct en poinct, avec vne telle façon, langage si copieux & fluide, le fil & ordre de l'oraison si bien disposé, que tous ceux qui estoient presens, admirerent la grandeur de son esprit, si vif & nerueux en vn corps si malade, & dés si long tēps debilité.

C'ESTOIT le Prince en amour & dilection le plus entier, qu'on sçauroit desirer, & qui principalement aimoit son sang, comme est cy dessus exprimé, & comme les effects ont fait paroistre, ores que l'occasion s'est offerte, tant enuers le Roy son frere, qu'enuers Monsieur, le Roy, & Royne de Nauarre. Il aimoit aussi singulierement Monsieur le Grād-prieur, son frere naturel, & si auant, que durant sa



maladie, il ne portoit patiemment son absence : mesmes iusques à se mettre en cholere quelquefois, sil s'essongnoit tant fust peu de luy. Monsieur le Marechal de Retz, Monsieur de Paris, & Monsieur de la Tour, ses freres, ont amplement fait espreuue de la grande amour & dilection de ce grand Roy, qui n'aimoit pas volontiers personnes, ausquelles il ne remarquaist quelques marques rares & singulieres de vertu. Que si d'aventure les viciex se presentoiēt deuant luy, & l'importunoient de leurs presences, il cerchoit tous les moyens possibles pour se distraire de leurs propos. Tantost faisoit lire, ou des vers François, ou les Annales de Frâce, ou Giron le Courtois: quelquefois des anciens Historiës. Faisoit chāter en Musique, iouer du Luth, de

l'Espinette, ou de la Lire, demeurât ce pendant tout songeart & pensif, & l'entredeux des yeux refrongné: où il auoit vne raye bien profonde, qui protestoit vne grandeur & Majesté venerable. Faisoit assez paroistre à ceux, qu'il voyoit à cōtrecueur, combiē peu leur presence luy donnoit de contentement.

SA memoire estoit rare & excellente, fust à se souuenir des choses memorables, qu'il auoit ouy dire, ou à reciter ce qu'il auoit veu de rare & singulier en son Royau-me, tant concernant les mœurs de diuerses prouinces d'iceluy, que l'industrie des habitans d'icelles. Vn iour il discourut en son liēt la façon de faire le papier, si curieusement, nommant tous instrumens par leur nom, & proposant l'ordre de l'art si naïfement, que chacun

l'oyant discourir, eust iugé qu'il en estoit maistre passé: & autât de toutes autres choses remarquables qu'il auoit veuës. Il nommoit ses seruiteurs nom par nom, en quelque grand nombre qu'ils fussent. Parloit des pais, conditions & qualitez de la plus part d'iceux, avec vne memoire si certaine, qu'il n'est rien de plus asseuré. Et quât à ceux qui luy estoient domestiques seruans aupres de sa personne, ils ne l'ont iamais veu transgresser la Loy de l'Apostre pour leur regard, laquelle commande que le Soleil ne se couche sur la cholere de l'hôme Chrestien. Que si d'auenture il auoit esté offensé d'aucun d'entre eux, au moyen dequoy il se fust courroucé, il ne falloit iamais coucher sans les auoir repatriez, & fait paroistre, qu'il estoit marry, par

L A V I E D V

Responſe  
plaiſante  
du Roy.

maniere de dire, de les auoir faſchez par ſon courroux. C'eſtoit le Prince autant facetieux en ſes bõnes, qu'autre ſçauroit eſtre. Et me ſouuient, qu'vn iour il nous recita à ſainct Germain en Laye, vne reſponſe qu'il ſeit à vn certain Seigneur, qui luy tenoit propos de la Royne ſa femme, pour lors groſſe de ſa fille vnique, Marie Elifabet de France, luy propoſant le danger où elle eſtoit, ſi eſtant en compagnie, ou preſſe de gens, elle eſtoit gaſtee au fruit qu'elle portoit. A quoy il reſpondit d'vne grace gẽtille: Non ſera, ſi ce n'eſt que ſainct Auguſtin la face auorter. Cela diſoit-il, pour la voir aſſidue à la leçon des liures de ſainct Auguſtin, qu'il a eſcrits de la Cité de Dieu, à laquelle elle ſe plaiſoit ſingulierement. C'eſtoit le Prince le plus Iouial, & le plus copieux



copieux en moyens pour se dōner du passetēps honneste, qu'autre fut iamais. Cela faisoit il, pour auoir en haine & detestatiō l'oyfueté, apres auoir vacqué à entendre aux affaires serieuses de son Royaume, pour se distraire des fascheuses apprehensions, voyant les choses bien souuent reduites en l'estat le plus malheureux du monde, tant par la malice d'aucūns de ses subiets factieux & rebelles, que simulations de politiques, non gueres moins infideles que les autres, & qui le trahissoient à veuë d'œil, mais avec vne prudence si grande, & si cautes intelligences, qu'il estoit malaisé de les surprendre au faict, principalement à vn Prince si debonnaire, & si loing de l'ingratitude, & qui malaisément pouuoit se persuader, que ceux, à l'endroit desquels il estoit si

LA VIE DV

liberal, luy rendissent pour toute recompense, de si mauuais offices. Non toutefois qu'il fust si mal aduisé, qu'il n'en souspeçonnast quelques vns, par les coniectures qu'il en colligeoit d'une part & d'autre: le nom desquels il ne descouuroit pas volontiers, si ce n'estoit à ceux qu'il cognoissoit entiers, & inuiolables en matiere de loyauté. Et sil estoit question de prudemment cacher en son cueur chose qui meritoit n'estre descouuerte, pour importer au seruice de Dieu, & soulagement de son peuple, il y marchoit avec vne prudence si tres grande, qu'il n'y auoit celuy, qui apres l'exécution de ses desseins n'admirast sa froidure exterieure, pleine d'ardeur en son cueur. En tesmoignage dequoy le lendemain de la saint Barthelemy il respōdit

à vn Seigneur, qui luy disoit qu'on n'esperoit pas cela de luy : Aussi, dit-il, mon bōnet ne le sçauoit pas. Cela luy estoit plus que necessaire, pour se guarentir d'infinis dangers, que la malice du tēps, ou plustost impieté de ses mauuais subiects, luy tramoient du iour au lendemain. Tesmoin en est la derniere annee de sa vie: en laquelle depuis le mois de Nouembre iusques à l'entree du mois d'Auril, il se trouua rechargé de trois coniurations, l'vne à Compiegne, l'autre à saint Germain en Laye, & l'autre au Bois-de-Vincennes: Auquel lieu tels pensoient surprendre, qui furent surprins: tesmoins le Comte de Caconas & la Mole susdits, & plusieurs autres, que ie tais pour obuier à prolixité.

TELLE a esté sa pieté, telles ses



mœurs, tels ses louables exercices, sa fermeté & constance telles. Je sçay bien, où tu m'attends, heretique & mescreant, pour m'arguer de flatterie, comme taisant les imperfections, qui pouuoient estre en mon maistre (que ie n'estimay iamais Dieu, ny Ange, ny homme impeccable) m'arguant, comme sortant hors des limites & traces des anciens Prophetes, qui escriuans les histoires des Roys d'Israël & de Iuda, ne taisoient nom plus les vices, que les vertus. Tesmoins en sont tous les liures des Roys. Et quant & quant exaggereras les imperfections de ton Roy, que tu n'as eu honte d'exprimer en tes escrits, comme prompt à iurer. Tu diras aussi, qu'il a eu vn enfant, auant estre marié, de Marie Touchet, fille d'Orleãs. Cela est plus vray, que



ie ne le desirerois : mais ce n'est pas mon deuoir, comme le tië, de mesdire de mon Roy, & de mon Prince naturel. Sainct Paul n'ignoroit pas, que celuy, qui le faisoit souffleter cõtre droiët & raison, ne fust vicieux: Si fut il pourtant marry de l'auoir appellé Muraille blanche, apres auoir esté aduertý de son auctorité. Daud sçauoit bien les crimes de Saül, & si ne les publioit pas. Ah, si tu l'eusses veu comme moy, receuant humblement, & durant sa vie, & prochain de sa mort, les reprehensions, que selon le deuoir luy en faisoient ceux qui auoient charge de son ame, & portoiët deuant luy la parole de Dieu: si tu l'eusses veu souuent pleurer ses pechez, comme moy, & cognu particulièrement sa douceur & bonté, tu n'en parleroís si desbordeemët,

# LA VIE DV

que tu as esté coustumier iusques icy. Je te diray bien dauantage, que si tous ceux, qui auoient accez auprès de sa personne, eussent eu le naturel aussi bien disposé à la vertu, que luy, & qu'aucuns d'entre eux, non si accomplis qu'il eust esté expedient, ne l'eussent à patron acheminé, voire contraint à iurer, & autres actions de fragilité, tu l'eusses veu le Prince moins iurant, & autant chaste, que tout autre. Temoin en est le Roy son frere: qui ayant la mesme nature, & destitué de tels iuristes, n'a esté onques veu ny ouy iurer. Et où est le bon naturel, que l'accointance d'un seul vicieux ne depraue? Je diray bien plus, & protesteray deuant Dieu & les hommes, qu'il auoit l'ame & la nature si bonne, que se voyant auprès personnes qui respectassent la

vertu, & desquelles il eust le nom en recômandation, on ne le voyoit entrer en tels ou semblables propos, nomplus que si iamais ne luy estoit adueni. D'où lon peult aisément veoir, cōbien la presence des hommes d'honneur & de vertu est necessaire aupres des Princes, qui ornez d'une bonne nature, n'apprenent vice ny mauuaise complexiō, que par l'accoinctāce des mauuais seruiteurs qui les abordent, & peu à peu corrópent leurs bōnes mœurs, & genereux naturel. Iamais ce bon Roy n'a esté ouy iurer, ou tenir propos indecent, ayant aupres de luy Mōsieur d'Auxerre, son Grâdaumosnier, & Mōsieur Rusé Euesque d'Angers son Confesseur.

A v reste, il estoit honteux aux choses indecentes, & peu conuenables à sa grandeur, doux & be-



LA VIE DV

ning aux reprehensions, autāt que le moindre de ses subiects. Et me souuient, qu'un Dimanche des Letanies, en la premiere annee, que i'eus l'honneur d'estre receu à son seruice, traitāt ce lieu de saint Ieā, *Quand mon Consolateur viendra, il arguera le monde de peché:* I'amenay vne histoire de Nicetas, de la vie de Alexis Comnenus, de la mort malheureuse d'iceluy, meurtry par Andronic, son oncle, soubz pretexte du bien public, serment qu'il auoit presté à la Couronne, & correctiō des abus qui regnoient en la Cour: où pendant que l'Empereur en son ieune aage s'amusoit à picquer des cheuaux, chasser, & prédre ses plaisirs avec les ieunes de son temps, les Courtisans estoient partis en deux, sçauoir en lubriques & pailards, & en auares, espuiseurs des finances



finances Imperiales . Aufquels discours ie vous laisse à penser, fil y en auoit de grattez, où il ne leur demangeoit . Tant procedé, qu'un certain, à moy incognu, se voyant au nombre des estrillez, irrité contre moy, feit tous les efforts du monde, pour me mettre en la disgrace du Roy mon maistre: qui n'ayant encores atteint l'aage de seize ans, que ce ne fust tout, aperceut promptement où tendoit la malice de ce rapporteur. Et, à dire vray, de prime face fut aucunement esmeu cõtre moy. Toutefois instruit & informé de mon innocence par Monsieur d'Auxerre, son Grand-aumosnier, qui m'aduertit de tout, & que i'informay de mon intention, le bon Prince mesmes m'ayant ouy, me cõmanda de vouloir continuer, m'assurāt qu'il n'en

Douceur  
admirable  
du Roy.

fut iamais si fasché contre moy, qu'aïse & content, d'en voir la bile des plus coupables esmeuë. Colligez, ie vous prie, de ceste petite digression, combien doulce & benigne estoit sa nature. Quelquefois les heretiques l'importunerent de vouloir me priuer de l'honneste liberté deuë au deuoir de ma charge, se sentans faschez, pour m'ouyr deschiffrer publiquement leurs erreurs, avec le plus d'art & de raisons que ie pouuois. Ausquels il respondoit ordinairement, Qu'est-ce qu'il dit, qui ne soit vray, & à quoy le moindre, & plus rustique du monde ne morde? Vous voulez que i'outrage si auant mon hōneur & ma reputation, que de fermer l'huy à la verité. Oyez, auant le condamner, ses raisons, avec telle volonté, qu'il vous les dira, & vous

n'y trouuerez nomplus que mordre, que moymesme.

O COMBIEN constamment il soustint mon innocence, 'estant à Angers ! Auquel temps vn calōniateur effronté m'accusa iniustement d'auoir indecemment parlé de la Royne sa mere, que i'ay tousiours honoree en mon cueur, comme ma Princesse naturelle. Mais finalement le rapporteur n'en receut que sa honte. Car ie m'en purgeay si tresclairement, que leurs Majestez cognurent aisément, quelle difference il y auoit entre mon innocence, & la coulpe, voire mauuaistié extreme du rapporteur, qui ne taschoit pas tant, possible, à mon desauancemēt, qu'aux fins de priuer l'Eglise de Dieu, & leurs Majestez, du fidele & loyal deuoir, que i'ay tousiours desiré de rendre

LA VIE DV

à ma charge. La Royne, mere du Roy, estoit aucunement esmeuë contre moy, pësant le rapport estre veritable: comme de vray elle eust eu grande raison, si ie me fusse tant oublié, attendue la priuauté que i'auois, de luy pouuoir dire priuément, ce que le deuoir ne permettoit de produire en public. Cependant le bon Roy protestoit ne croire ce faux rapport de moy, comme il me feit entendre par vne lettre qu'il luy pleut m'escire: Laquelle receuë, ie me rendis à Angers, pour y prescher le reste du Quaresme, y arriuant le Samedy de la Passion. Où ayant esclarcy mon innocence enuers leurs Majestez, le pelerin rapporteur fut cognu pour tel qu'il meritoit.

TElLES & semblables ont esté les vertus du feu Roy mō mai-



stre, Lecteurs, duquel les actions memorables requerroient vn volume plus ample, & vn esprit plus adextre, pour les renuoyer à la posterité. Que si ie me suis hazardé d'en produire ce petit eschantillon: pensez, ie vous prie, que c'est plus pour femondre les esprits plus capables à parfaire le residu, que pour m'estimer apte à reduire sa vie, ses vertus, & graces en escrit, suyuant ses merites.

A v reste, ie n'ay point traicté de sa maladie, ny des causes d'icelle, & de la mort qui s'en est ensuyvie. Je laisse cela à ses Medecins, qui l'ont & traicté malade, & visité apres sa mort, à la sectiō de son corps. Seulement ie m'arresteraý à l'indisposition de son cueur, pourautāt que cela semble appartenir aucunemēt à mon deuoir: lequel on a trouué

L A V I E D V

flestry, priué de pericardie, petite  
 toilette, qui sert de pauillon au  
 cueur: Et brief, son cueur a esté  
 trouué destitué d'humeur. D'où  
 est aisé à iuger, que la cause princi-  
 pale de sa mort a esté la tristesse  
 cōtractee de longue main, se voyāt  
 dès son ieune aage assailly de trahi-  
 sons, reuoltes, & toutes especes  
 d'impietez, que les meschans d'en-  
 tre ses subiets, bien souuent dome-  
 stiques, luy brassoient: de maniere  
 qu'il y a desia treize ou quatorze  
 ans qu'il commençoit à mourir  
 tout à loisir, comme respōdit Ale-  
 xis, Philosophe fort anciē, à vn qui  
 luy demandoit, Que fais tu? Je  
 mœurs (dit-il) tout à loisir. Et qui  
 est celuy (s'il n'ignore sa pieté, ses  
 mœurs, & sa vertu) qui ne l'estime-  
 ra digne d'estre nombré entre les  
 Martyrs, meurtris & tyrannisez le

plus cruellement pour la querelle de Iesus Christ? Pourquoy a-il esté mal voulu, que pour auoir esté Prince tres-chrestien, & desiré la cōseruation de la foy Catholique, & extirpation des heresies en son Royaume? N'a-ce pas esté tousiours la coustume des heretiques, que d'en vouloir à la vie des Princes, qu'ils cognoissoient peu, ou mal affectez à leurs erreurs & impietez? Clouis, premier Roy Chrestien en ce Royaume, en sçauroit bien que dire, q̃ les Arriens ne peurent endurer, aduertis qu'il s'estoit fait baptiser en l'Eglise Catholique. Autant en protestent les rebellions du Pays-bas en Flandres, & celles de l'Escocce, contre leur naturelle Princesse, qu'ils ont & calomniee outrageusement, & poursuuie capitalement: brief, reduite

L A V I E D V

entre les mains de celle, qui pour tout deuoir de parenté & office d'hospitalité, deu à celle qui s'est rendue entre ses braz, comme à vn asile & asseuré refuge, la tient comme captiue & prisonniere. Aussi est elle de la Religion, qui forge communement de telles actiōs, & œuures de misericorde, faites à contrepoil.

CROYEZ donc, Lecteurs, que les heretiques François, & autres ses ennemis, ou plustost rebelles subiects, ont esté les meurtriers de sa vie, plus que l'alteration de ses poulmōs: qui mesmes, à dire vray, n'est procedee dailleurs, que de l'ennuy & tristesse insupportable qui rongeoit son cueur. Et c'est pourquoy, le consolant quelquefois en sa maladie, il me respondit, que le principal de son mal gissoit



soit dans son cueur. Et quelquefois  
 mesmes Monsieur d'Auxerre luy  
 disant, le voyant triste & pensif:  
 Sire, vous auez quelque ennuy, il  
 respondoit promptement: Mais ie  
 n'en ay point d'occasion, à vostre  
 aduis! Que si l'esprit triste desseiche  
 les oz, & tel desseichement peu  
 à peu mine la vie de l'homme: ou  
 si, comme souloit dire Menander,  
 il n'y a pire maladie que la tristesse:  
 est-il de merueilles, si elle a deuacé  
 les iours de ce ieune Prince, plus-  
 tost preueni de la mort, que d'a-  
 uoir attainit l'aage de virilité? On  
 regretteroit vne pauvre fleur, que  
 vn orage faneroit, auant estre du  
 tout espanouye. Et qui ne regret-  
 teroit (fil n'est du tout sans com-  
 miseratiō) la mort de ce ieune Roy,  
 dont il a esté surprins, au temps  
 qu'il commençoit à faire paroistre

LA VIE DV

la grandeur de son cueur, & excellence de son esprit? Mesmes le sçachant si indignement & cruellement traicté des siens, qui au lieu de subiection, & de l'obeïssance à luy deuë, n'ont iamais cessé de l'affliger, iusques à ce que il a esté au cercueil?

ET à fin qu'aucun n'ignore, cōbien Dieu l'aimoit, il m'a semblé bon de ranger icy vn petit extraict des choses rares & memorables, dont Dieu a fauorisé le temps de son regne: durât lequel toutes choses semblent auoir esté rares & singulieres, comme il auoit l'esprit singulier & excellent. Que si mesme il a eu des ennemis, la saison mesme les a produits rares & insignes en leurs mauuaistiez. Aufquels ie commenceray à faire le denombrement, pour deuorer d'en-

tree le mauuais gouſt de leur reputation, & acheuer par les choſes, deſquelles la memoire ſera douce & aggreable à chacun, & laiffera bonne bouche, à quiconque les fauourera.

PREMIEREMENT a veſcu de ſon temps Iean Caluin, natif de Noyō, qui de Maiſtre és arts ſe feit Apoſtre de Geneue, avec le cōſentement des habitans d'icelle, inſigne en ignorance, en matiere de Theologie, comme appert par inſinis lieux de ſon Inſtitution, que ie ne remarqueray à ce coup, & qui ſeront aſſez aiſez à remarquer, à quicōque eſt tāt ſoit peu verſé en la cognoiſſance de la Philoſophie & des lettres Sainctes. Il eſtoit inſigne menteur en matiere d'inuenter calomnies contre les Catholiques, à tors & à trauers, par meſme moyē

L A V I E D V

rare en malice, vindicatif, bouillant & factieux encores, sa mine & sa contenance ressemblant à celle de Arrius, qu'Epifane décrit clairement.

ET luy a succédé Seba, ou Beze, fils de Vezelay, bon sacrilege, vendeur de benefices, excellent en toute volupté, amoureux d'Aldebert, autant adextrement poursuivant la rare malice de son predecesseur, qu'autre sçauroit faire. Brief, c'est vn Apostre si modeste, qu'il n'y a trahison brassée en France depuis quatorze ans, qui ne soit procedee de sa forge, querelle ny partialité, ligue, ou faction, dont il n'ayt esté l'inventeur, & dequoy il n'ayt fait le modelle. C'est luy, qui à l'imitation d'Apollinaire, & de Paul Samosatén, a fait present aux Dames, & aux curieux heretiques,



des Chançons, qu'il a nommees Pseaumes, pour estre chantees en leurs congregations.

PAROCEL & Despina, avec plusieurs autres, estoient de mesme farine, mais non si rares hypocrites que du Rosier, qui, de peur, renia sa Religio, mesme par escrit : & apres, faisant semblant de vouloir seruir à Dieu & à son Eglise, & reparer le mal qu'il auoit fait, depuis qu'il auoit apostaté, finalement se rendit relaps ; se faisant paroistre si digne d'estre creu entre les siens, comme il festoit monstre entre les Catholiques, qu'il a trompez par son hypocrisie.

LE Chef des entrepreneurs entre les Gentilshommes partiaux & heretiques estoit Gaspard de Coligny, qui, se iouant d'un curedent, songeoit ses dāgereuses entreprin-

fes, ayāt pour executeur d'une par-  
 tie d'icelles d'Andelot, son frere, &  
 pour Cōseiller le Cardinal de Cha-  
 stillon son autre frere: qui estoit, ou  
 pensoit estre, si caut, qu'il pensoit  
 amuser la plus part du monde à sa  
 mine, portant, tout heretique qu'il  
 estoit, sa robbe & bonnet rouge,  
 son rochet & camail. Ce que voyāt  
 vn iour le bon Roy, sortant de sa  
 chambre à Fontaine-bleau, ayant  
 apres soy vn grand dogue, nommé  
 Armaignac, le print par la robbe, &  
 le luy monstroit, l'agaçant à le mor-  
 dre, criant Au loup, au loup. Et le  
 cuida le chien endommager: mais  
 les assistans l'empescherēt, non sans  
 regret d'aucuns spectateurs. Cecy  
 ay-ie escrit pour ouyr dire, à fin  
 qu'on ne le mette à autre pris que  
 ie le baille. Toutefois me fut dit  
 par vn, qui se disoit estre present.

A quoy on pourroit iuger veritable ce que les Ministres heretiques, à la ville de Montauban en Quercy, auoient prophetizé de luy (comme fait Caïphe de Iesus Christ) en la deuise qu'ils mirent à l'entree de son logis, quand il arriua en ladite ville, où y auoit escrit en Latin, *Sacrum gestans in pectore ignem*: Vouls par cela signifier, que ce ieune Roy portoit en son cueur caché vn feu sacré de pieté, & d'ardeur en la Religion Chrestienne. Mais en cela se trôpoient ils, d'autant qu'ils l'estimoient secret Huguenot, ayât au cōtraire vne ardeur & grād zele pour la foy Catholique, & contre l'infidelité heretique. Je laisse à part Cauaigne, Briquemault, Teligny, & plusieurs autres insignes fauteurs de toute impieté, desquels la mort a du tout ressemblé à la mi-

L A V I E D V

ferable vie qu'ils auoient menee. Reste à parler des autres choses memorables, & à bon droit dignes d'estre enuoyees à la posterité.

P R E M I E R E M E N T, de son temps y a eu vn Pape Pius, cinquieme du nom, de qui la pieté, sainteté de vie, & ardeur en la Religion Chrestienne a esté recommandable, mesmes entre les heretiques: & qui, venât de l'ordre de S. Dominique à tout sa simplicité, a plus donné à penser au grand Turc par ses prudêtes menees, que plusieurs de ses predecesseurs (sans comparaison soit dit) sans toutefois oublier la sollicitude qu'il auoit sur l'Eglise Chrestienne: à la reformation & reiglement de laquelle il procedoit si dextrement, que la cité mesme Romaine en est depuis  
toute



toute renouuелlee en tout exercice de pieté & vertu. Chacun ſçait cōbien heureuſement & ardemment il entendit à la pourſuyte & accōpliffement du Concile de Trente, l'vn des plus celebres en aſſemblée de Prelats, & hommes doctes, qui ayt eſté depuis le temps des Apoſtres. Il ſeit reduire en meilleur ordre l'Office Romain, tant au Breuiare, qu'au Meſſel. Brief, c'a eſté vn des miracles de noſtre temps, & qui par le moyen de ſon ſucceſſeur Gregoire treizieme, à preſent ſeant au ſiege Apoſtolique, ſera cauſe inſtrumentale, qu'on fermenta la bouche des impudens & heretiques, treſaiſes de pouuoir calomnier & meſdire de l'Egliſe Catholique, pour peu d'ombre de verité, qu'ils trouuent ſur les miniſtres d'icelle.

VN cas admirable fut la deli-

L A V I E D V

urance de la ville de Thoulouse, au temps des premiers troubles : auquel temps la plus part des Magistrats politiques estoient de la faction Caluinesque, & qui auoient desarmé les Catholiques, saisy les armes & munitions de la ville, les clefs des portes, & principales maisons d'icelle, sans que les pources Catholiques eussent que des ferremens rustiques, des pierres & du feu pour se defendre, & deliurer de leurs cruautez. Et dura le tocsainct dans la ville l'espace de quatre ou cinq iours, sans cesser, le pauvre peuple cōbattant iour & nuict, non sans la perte de plusieurs. Finalement, par la sagesse, diligence & vertu de Messieurs, tāt du Clergé, de la Cour, que d'aucuns bourgeois Catholiques, la ville fut secouruë à propos par les Seigneurs

de Montluc, de Terride, de Montmaur, Basfordan, les Sauignacs, & autres, tant de pied que de cheual, qui ioincts au peuple, contraignirent les Caluinistes d'abandonner la ville à belle minuiet, & prendre la fuyte à trauers les champs, non sans perte de beaucoup d'entre eux, qui furent tuez par le vulgaire par cy par là, sans aucune discretiõ de sexe ny d'aage. Et croy, que depuis la ville de Thoulouse ne passe par la memoire de ceux qui restent d'entre eux, sans frayeur. Aussi luy ont ils donné depuis des traueses les plus grâdes qu'il leur a esté possible, comme d'autrepart elle en a chastié ceux, qui luy sont tombez en main, aussi roidement que leurs demerites le requeroient.

Q V I ne mettra la deliurance du Roy de l'entreprinse faite pour

le prendre en la ville de Meaux, vn veritable miracle, en iugera indifcretement, partie par ce que les ennemis festoient secretement approchez si pres de la ville de Meaux, & si à propos, pour executer leur dessein, qu'il sembloit estre impossible d'euader leurs mains : & partie aussi, que maistre Michel de l'Hospital, pour lors Chancelier de France, intimidoit tous ceux, qui en donnoient certain aduertissement, disant, qu'il les falloit tenailler, comme perturbateurs du repos public. Ainsi nommoit il l'interruption des coniurations faites cõtre le Roy, son sang, & son Estat. Et tant estoit bon Chrestien ledit Sieur, que pour donner aduertissement aux heretiques, qu'il falloit rompre les Eglises, & edifices du Clergé, disoit, que pour



chasser les pigeons, n'y auoit meilleur expedient, que de rompre les coulombiers. D'où, à mon aduis, sortit la rage des heretiques François, qui en moins de six ans ont plus demoly d'edifices, que les ancestres n'en auoient basty en six cēs ans.

L'ENTREPRISE de Meaux eust esté executee, si Dieu n'y eust pourueu, tant pour auoir acheminé huiēt mille Souyffes en ladite ville de Meaux: de la leuee desquels les heretiques mesmes auoient esté cause, pensans s'en preualoir, soubz l'auctorité de d'Andelot, Colonnell de l'Infanterie Françoisē. Mais Dieu les en frustra, & dōna telle vigueur aux paroles d'aucuns Gentilshommes, qui donnoient les aduertissemēs certains de la coniuration, que finalement le Roy & la Royne sa

L A V I E D V

mere, furent persuadez de partir la belle nuit, les Souyffles leur seruās de haye, & le Roy marchant en teste, sans s'effrayer en façon du monde: & ainsi arriua il seurement en la ville de Paris, à la grand ioye & extreme contentement des habitans Catholiques d'icelle.

C'EST chose memorable, que de veoir les hommes doctes, & exercez à la prediciō & à la leçon des lettres Sainctes, qui ont flory durāt le regne de ce bon Roy, desquels sont à present trespassez en Paris feu Monsieur Picart, Monsieur Seneschal, Curé de sainct Seuerin, Monsieur Parpignen, de la societé du nom de Iesus, Monsieur Demochares, & plusieurs autres bien meritez de la pieté & bonnes lettres.

EN Thoulouse florissoiēt Mon-

sieur Melchior Flauin, de l'ordre de S. François, Monsieur Araignõ, Monsieur Viguerius, qui a escrit doctement, Monsieur Peletier, de la societé du nom de Iesus : & sur tous estoit en grande reputation Noble Iean de Valzergues, dit de Serez, homme admirable, tant en pieté & simplicité, qu'ẽ industrieuse façon de prescher. De mesme temps estoit frere Esprit Rotier, de l'ordre de saint Dominique, Inquisiteur de la Foy en ladite ville de Thoulouse.

A O R L E A N S viuoit en grande & louable reputation frere Philippes Picart, de l'ordre de saint François, natif de la Fleche, en Anjou, comme ie croy : Homme qui avec la bonne vie & doulce conuersation, iointes à l'industrie de bien prescher, auoit tellement gai-

gné le cueur des habitans de la ville, qu'onques homme n'y fut si plaint & regretté que luy, qu'on sache. Aussi leur auoit il monsté, combien il les aimoit, durant l'espace de sept mois qu'il fut caché en vn groton chez Sire Martin Prouenchere, marchand de ladite ville, où il n'estoit sans danger d'estre deféré aux heretiques, qui pour lors tenoient la ville, tât pour estre estroitement logé, & parmy douze enfans de famille, ou enuiron, que pour estre son logis enuironné d'heretiques de toutes parts. Mais Dieu, qui n'oublie les siens au besoin, l'en deliura ores, que Mōsieur le Prince-Daulphin s'empara au nom du Roy de ladite ville, qui depuis a demeuré en son obeïssance, & a esté repurgee de la plus part de ceux qui la violentoient.



I E ferois prolix, si ie voulois,  
 & auois le moyen, de dilater les  
 louanges des hommes doctes, qui  
 sont encores viuans, & qui pour  
 leurs vertus & sçauoir meritent  
 d'estre honorez de perpetuelle me-  
 moire. Entre lesquels ie mettrois  
 volontiers Monsieur Amiot, Eues-  
 que d'Auxerre, & vrayemēt, Grād-  
 aulmosnier de ce grand Roy, hom-  
 me de grandes lettres, principale-  
 ment rare en la cognoissance des  
 lettres Grecques. Ie ne tairois pas  
 aussi le sçauoir de Mōsieur d'Anez,  
 Euesque de la Vaur, Monsieur Vi-  
 gor, fait pour sa doctrine & vertu  
 Archeuesque de Narbone, par no-  
 stre saint Pere Gregoire treizie-  
 me, à present seant au siege Apo-  
 stolique: Mōsieur de Saintes, nō-  
 mé à l'Euesché d'Eureux: Mon-  
 sieur Genebrard, homme entre

LA VIE DV

tous estimé en la cognoissance des lettres Grecques & Hebraïques, & non moins vertueux que docte. Je pourrois sur ce propos nommer infinis autres doctes personnages, qui ont flory en France, durant le regne de ce bon Roy. Entre les Lecteurs Theologiens, on a tousiours grandemēt estimé feu Monsieur Galterus, Docteur en Sorbōne, comme lon fait encores Monsieur Hugonis, bien exercé, & mesmes en la predication, que le feu Roy auoit nommé entre ses predicateurs, & employé volontiers à affaires d'importance, pour le cognoistre zelateur de l'honneur de Dieu, & de l'vtilité publique, homme entier & sage. Entre autres a grandement profité aux leçons de Theologie Maistre Iean Maldonat, natif de Grenade, de la societé

du nom de Iesus, de qui la classe & les leçons ont esté vne vraye forge à disposer les esprits, tant à la science de Theologie, qu'à la predication de la parole de Dieu. Hors de ce Royaume ont flory plusieurs autres rares & illustres personnages, comme Monsieur Hosius, Poulônois, Assote, Iean des Haisselles, à Louvain cestui-cy, & l'autre en Espaigne: François Turrian, à present à Rome, homme de grande literature, & merueilleusemēt versé aux Escritures sainctes, comme ses escrits monstrent assez, sans qu'il soit besoin que ie passe plus outre au recit de ses merites. Qui aura le loisir, acheuera de recueillir les noms d'infinies autres personnes illustres, de mesme profession que les susdits.

S O V B s mesme regne a flory &

L A V I E D V

florit encores Jean Aurat , Poëte veritablement Royal, soit en bonté & simplicité, ou en bon heur & excellëte industrie à faire des vers, tant Grecs que Latins: en quoy certes il se fait paroistre le premier de nostre temps.

A L V Y merite d'estre ioinct Maistre Pierre Ronsard, Poëte François, & à vray dire, le pere de tous ceux de sa profession, non moins rare & excellent en icelle, que souloit anciennement estre Homere entre les Grecs, Virgile ou Horace entre les Latins: qui despouillant presque toutes les langues, a heureusement enrichy la Françoisë de la despouille d'icelles. Bon Dieu, que le Roy l'aimoit ! qu'il cherissoit ses labeurs ! & par toutes les caresses possibles, allumoit la gaillardise de son esprit, & fortifioit la



veine de sa graue Poësie. Ses riches & doctes vers font assez paroistre la grandeur de son esprit, sans qu'il soit besoin que mon bas & rude style le louë dauantage.

COMME ce bon Roy estoit heureux en cest endroit, aussi estoit il heureux en succez prospere de la plus part des troubles qui l'assailloient, battant tousiours ses ennemis à sa volonté: toutefois liberal en leur endroit, toutes les fois que ils faisoient semblant de luy estre fideles subiets, & embrasser ses cōmandemens. A raison dequoy, pēfaisant les vaincre par doulceur & liberalité, il s'estoit mis si auant en frais, que son Domaine, ioint à ice-luy le patrimoine de l'Eglise, ont enduré la foule de toute la despense employee à contenter les ingrats & infatiables subiets, crians sans

L A V I E D V

cesse, cōme dit le Sage des Sāgſues,  
Apporte, apporte, & iamais, C'est  
assez.

D V R A N T le mesme regne est  
aduenue vne chose admirable en  
la maison du Roy Catholique,  
Philippes, Roy des Espaignes, qui  
ayant descouuert l'entreprinse que  
les heretiques brassoient sur sa vie  
& Estat, par le moyen de son pro-  
pre fils legitime & naturel, finale-  
ment le feit garder estroitement, &  
prier de tout ornement, & seruice  
de Prince: dont il entra en si grande  
melācolie, qu'ẽ peu de tẽps il mou-  
rut. Et fut recognu & nōmé auant  
estre mis en sepulture, suyuant la  
coustume des Espaignes, à fin qu'il  
apparust à chacun & de sa mort, &  
de la constance & magnanimité de  
son pere le Roy susdit.

L A victoire que Dom Iean

d'Austrie, son autre fils, expugneur de l'armee Turquesque, & conducteur de l'armee de la ligue des Princes Chrestiens, est vne des choses autāt memorables, qui soiēt aduenues durāt le regne de nostre Roy. Car les forces du grand Turc y furent si auant debilitees, que chacun l'estimoit hors de moyen de se pouuoir remettre sus d'vn bien long temps.

VNE memorable Eclipse de Soleil apparut au mois d'Auril, precedāt la iournee de Meaux, des plus grandes qui ayent esté il y a vn bien long tēps, suyuy des guerres ciuiles, qui depuis ont duré, sans donner que bien peu de relasche, tant en ce Royaume qu'en Flandres.

QUELQUES iours auant la bataille de Moncontour, le Roy

estant à Tours, oyant sa Messe, au mois d'Aoust, entre dix & onze heures avant Midy, fut veuë vne Estoille reluisante au ciel clair & serain, le temps toutefois estant bië chaud & ardent: laquelle ie vey apres infinies autres personnes: & disoit chacun son aduis de sa signification & de son presage.

Q V E fil y eut iamaïs chose merueilleuse, & dont l'yssue admirable doiue estre attribuee à Dieu, c'est celle de la susdite bataille de Moncontour: attendu qu'un mois deuant le Roy n'auoit de forces comme rien, la plus part de son camp s'estant retiré d'un costé & d'autre pour se rafreschir. Ce pèdant print enuie aux mescreãs d'aller assieger Poictiers, se promettans d'y surprendre le Duc de Guise, qui estoit rendu là dedans industrieusement,



sement pour rompre l'entreprise faite sur icelle ville. Mais ils vendoyent la peau de l'Ours auant le prédre: qui leur fut si cheremēt vëdu, qu'apres auoir tenu le siege deuant ladite ville sept sepmaines, ou enuirō, fait tout effort de la forcer, se voyās brauemēt repoussez par la prouësse dudit Sieur Duc de Guise, & autres braues guerriers de sa suyte, le Roy Henry, à present regnant, recommença à assembler ses forces: alla battre Chastellerault, & brauement fait assaillir la bresche, esperant faire leuer le siege à ceux de Poictiers, comme il aduint. Et deslors perdirent les rebelles tout courage, & au contraire les forces du Roy s'aggaillardissoiēt du iour au lendemain: & fut si grande la diligence, & du Chef de l'armee, & de ceux qui le suyuoient, qu'en fin

contraignirent les rebelles à la bataille:& en fut l'yssue si admirable, que bien que les ennemis fussent en beaucoup plus grand nombre que les nostres, & qu'ils chantaissent le triomphe auant la victoire, si tourna la châce inopinément, & comme par miracle, de telle sorte, que les ennemis y perdirent de seize à dixhuit mille hommes, tant de pied que de cheual, qui en vn instât furent fauchez. I'ay ouy dire à Monsieur de Montpensier, Prince piteux, entier & vaillant, que quād il n'eust iamais ouy parler des effects de la prouidence de Dieu, ceste bataille estoit capable pour l'en instruire, & rendre toute sa vie certain & assuré. I'ay veu vne grande partie des meurtris, non encores enseuelis, quand le Roy s'acheminant à saint Iean d'Angely, seiour-

na à Oirõ, vne belle maison appartenante à Monsieur le Grand-Escuyer. Mais plus clairement en pourroiet parler Mõsieur & bõ amy Nicolas de Fumee, Abbé de la Cousture, pour lors tenant la place de premier Aulmosnier, & Monsieur de Sainctes, de Predicateur & Confesseur aupres du Roy Henry, à present regnât, & pour lors Lieutenant general, & Chef de l'armee pour le Roy, pour auoir esté presens à l'exécution de ceste grande & miraculeuse bataille.

A v x memoires susdits pourroit on ioindre plusieurs miracles aduenuz durant ce regne, qui à iuste cause pourroit estre appellé le regne des merueilles. Et par ce que i'en ay escrit de plusieurs en mon Traité des marques de l'Eglise, outre lesquels s'en trouueroit encore

pour faire vn volume competant, ie me contenteray d'en coucher icy trois ou quatre, non encor escrits, & autant memorables qu'autres qu'on sçauroit lire.

LE premier a esté fait en la cité de Laon en Laonnois. Il y auoit vn homme heretique, duquel le nom est assez cognu aux habitans d'icelle. Les troubles suruenãs, n'y osant habiter, gaigna les champs, laissant sa femme à la maison, toute fois heretique comme luy, mais qui par crainte se feignoit Catholique, & participoit au Sacrement de l'autel quant & les Catholiques. Dequoy son mary, estât de retour, la reprint aigrement, comme ayant renoncé à sa Religion. A qui elle respondit, qu'elle croyoit autât la presence du corps de Iesus Christ au Sacrement de l'autel, comme elle se



croyoit grosse d'un Crapault. Ad-  
uint qu'elle fut grosse, & au temps  
qu'elle deuoit accoucher d'un en-  
fant, produisit vn Monstre, ayant  
le corps d'un enfant, la teste, les  
braz, & les iambes d'un crapault,  
comme il a esté verifié par autho-  
rité de iustice, ainsi que l'Euesque  
de ladite cité m'a tesmoigné de sa  
propre bouche. Je descrirois au lōg  
les merueilles aduenues à la deli-  
urâce de Nicole d'Aubery, deliuree  
du malin esprit qui la possedoit, en  
pleine Eglise, tant de fois produite  
en public, & deuant tant de sortes  
de tesmoins le malin Esprit exor-  
cisé par ledit Euesque, si la petitesse  
de mon discours me le permet-  
toit. Mais ne m'estant loisible, m'en  
rapporteray à ce que les specta-  
teurs d'un acte si solennel, & qui  
sont en nombre presque infiny, en

peuvent tesmoigner.

A B O V R D E A V X, durant les premiers troubles, habitoit l'hoste de l'Aigle d'or, hōme depraué en la foy, & bōnes mœurs, de qui le souverain plaisir estoit de meurtrir les pauvres Catholiques, & principalement les Prestres. Les troubles appaisez, il fut surprins de la mesme maladie d'Herode, & couuert d'une si grāde quantité de Poulx, qu'il ne fut iamais possible l'ē nettoyer, que premier ils ne l'eussent meurtry, quelques remedes & quelques diligēces qu'on y sceust employer.

EN la cité de Neuers y auoit vn homme suspect d'heresie, qui contre la volonté des Catholiques habitans d'icelle cité, vouloit assister au Conseil de la ville, sans s'en vouloir deporter, quelques belles remonstrāces qu'on luy en feist. Ad-

uint vn iour, qu'il feftoit opinia-  
 ftré en pleine-maison de ville à mes-  
 mes fins. Chacun refolut de ne rien  
 traiter en fa prefence, & fut fur-  
 prins foudain d'un efuanouiffemēt,  
 ou pluftoft de la mort foudaine,  
 deliurant par ce moyen les Catho-  
 liques de la peine où ils eftoient cō-  
 ftituez par fon opiniaftrife.

QVANT est des aduertiffemēs,  
 ou fupernaturels, ou diuers, ils ont  
 esté en grand nombre durant ce re-  
 gne, tant pour l'vniuerfel, que pour  
 aucūns particuliers d'être les grāds.  
 Plusieus perfonnes premierement  
 fe font prefentees durant fon re-  
 gne pour reueler des vifions, qu'el-  
 les difoiēt auoir veuēs. Si elles font  
 vrayes, ou nō, ie n'en difpute point.  
 Vne chofe puis ie affeurer pour cer-  
 tain, que i'ay parlé à vne Nonnain  
 de l'Abbaye de fainct Antoine lez

LA VIE DV

Paris, natifue de ladite ville, paroisse sainct Marry, extraite de parens honorables : laquelle en vne vision qu'elle eut estant malade, chacun estant hors d'espoir de son salut, fut en vn instant guerie, & à la grande admiration de chacun, partant cōme de l'agonie de mort, alla rendre graces à Dieu en l'Eglise Nostre-dame de Paris, accompagnee de son Confesseur, venerable & docte homme Monsieur Pelletier, Grād-maistre de Nauarre, & Curé de S. Iaques de la Boucherie.

LADITE Religieuse me dist à moymesmes, preschant en l'Eglise sainct Marry dans Paris, qu'elle auoit receu second mandement d'une certaine vision d'aller aduertir Mōsieur Viole, pour lors Euesque de Paris, & ne sçauoit comment y satisfaire, pour autant que ledit Euesque



Euesque auoit mesprisé le premier aduertissement, voire, comme elle disoit, s'en estoit mocqué. La secõde iussion portoit, que s'il n'obeïssoit, corrigeant certaines choses, il mourroit peu de iours apres Pasques, comme chacun sçait qu'il aduint. Quelle visiõ c'estoit, ny quel le nom, ie n'en dispute point: seulement me contente de reciter fidelement ce que i'ay ouy de sa propre bouche.

B I E N pres de Puis-laurents en Albigeois, enuiron l'an mil cinq cens cinquante huiët, quelques iours auât la feste de la Toussaïcts, fut descouuert vn Esprit pythonique, parlant soubz la mamelle d'une ieune fille, qui predisoit publiquement aux heretiques de ce pais là, la desfaite d'entre Coignac & Chasteauneuf: & se disoit cest

Q

L A V I E D V

Esprit là estre l'ame de sa mere . A  
quoy n'y auoit espee de verité au-  
cune.

V N iour auāt le trespas de Mō-  
sieur le Prince de Condé, le Chap-  
peau de feu Monsieur le Cardinal  
de Bourbon, son oncle, qui estoit  
pendu au hault du chœur de Laon  
en Laonnois, tomba pendant que  
le Clergé disoit Vigiles pour les  
trespassez.

V N iour ou deux auant que le  
feu Roy mon maistre deslogeast  
de S. Germain en Laye, vne Fleur  
de lis, de trois qu'il y en auoit à vn  
Escusson de Frāce, taillé en pierre, à  
la clef d'une voulte de la salle du  
Bal audit Chasteau, tomba, comme  
plusieurs, qui l'ont veu, peuuēt tes-  
moigner.

LE mesme estoit aduenü le iour  
de la prinse du grand Roy Frāçois,

en l'Abbaye de Belleperche, assise sur la riuere de Garonne, à sept lieuës de Thoulouse, tirant vers Bourdeaux: auquel iour l'Escusson de Frâce, taillé en pierre, & qui seruoit de clef aux voultres du Refectoire de ladite Abbaye, tomba, & se brisa, comme i'ay ouy raconter aux Religieux, qui l'auoient veu, estant à ladite Abbaye, à la suyte de Monsieur le Cardinal d'Armaignac.

I' A Y grandemēt admiré vn discours, qu'vn de ces iours m'a esté discouru par vn, le referāt comme l'ayant veu. C'est qu'en la ville d'Avignon, durant le temps des premiers, & des presens troubles, venoit en pleine nuict vn grand flambeau de feu, qui faisoit la ronde à l'entour des murailles de ladite ville: & cela fait, s'estaignoit, cōtinuāt.

# LA VIE DV

par tous les soirs, à la veüe & grande admiration de tous les habitans d'icelle ville. Et appella on cela par successiõ de temps, La fausse rõde, Ce que m'a confirmé Monsieur de Seuerac, Secretaire du Roy de Navarre, & de Monsieur le Cardinal d'Armaignac, comme l'ayant veu de plus pres que de dix à douze pas. Que sil y en a d'incredules & difficiles à persuader, ie les exhorte à ne riẽ mespriser, iusques à ce que au preallable ils en soient deuëmēt instruits & informez: car autrement ce seroit iuger auant l'instruction du procez. Que si aucuns pensent, que ie vueille par ces discours introduire, ou nourrir la superstition de ceux, qui pourroient auoir abusé par cy deuant de telles ou semblables choses, ils se trompent, & sont aussi loing de mon but, que de



mes conceptiōs. Seulement ie m'arreste à la sentence de Dauid, disant, que Dieu a donné significatiō, c'est à dire, aduertissement, à ceux qui le craignent, à fin qu'ils fuyent de deuant son arc: c'est à dire, qu'ils eurent la rigueur de sa iustice, & par amendement de vie preuiennent sa misericorde. Et ainsi rapportans toutes choses à la gloire & hōneur de Dieu, sans y mesler ny superstition, ny abus, il n'y aura langue de calomniateur, tāt soit elle captieuse, qui puisse trouuer que mordre sur nous.

IL y a quelques annees que Mōsieur Sasse Tillon, Gentilhomme Manceau, estoit tellement vexé des Escrouelles, qu'il ne pouuoit trouuer repos, debout, assis, ny couché. Et pour autant qu'il faisoit profession de reformé ( car tel estoit le

nom des heretiques ) il ne pouuoit se persuader de se faire toucher au Roy dernier decedé CHARLES IX. Toutesfois contrainct par la mesme necessité, sy achemina, à la persuasion de ses parens & amis. Estât touché, soudain presque se sentit allegé de son mal, & disposé à la guerison: à raison dequoy non seulement il feit abiuratiō de l'heresie: ains persuada, voire commanda à tous ses subiects d'en faire autant, comme il est aduenū. Et a perseueré, & perseuere encores en la foy & religion Catholique.

CONCLVSION, le regne de nostre Roy treschrestien CHARLES neuvieme le debonnaire, peut iustement & à bon droict estre dit le regne des merueilles. Car soit que vous contempriez les hommes vicieux, vous les trouuerez, & leurs

actions, autant dignes d'admiratiõ  
en leur gère, que la vertu des hom-  
mes illustres de mesme saison.  
Vray est que ceste differēce est con-  
stituee entre deux, que la vertu est  
admirable en bonne part, & le vice  
en tresque mauuaise. Et qui, bon  
Dieu, croira d'icy à cēt ans les mes-  
chancetez perpetrees par les mes-  
chans, durant ce regne ? Soit aussi  
qu'on contemple les actions gene-  
reuses des hōmes illustres, les mi-  
racles suruenus diuinement, ou au-  
tres choses qui se font admirer,  
pour n'estre communes de toutes  
parts, on y trouuera des merueilles.  
C'est chose merueilleuse, que ce  
Royaume ait tant porté de mal, &  
mauuais traitement, qu'il a receu  
pour la plus part de ses propres &  
naturels enfans, plus que des  
estrangers : Chose admirable, que

L A V I E D V

l'Estat se soit cōserué entre tant de moyens, & de mauuaisés volōtez, que les ennemis d'iceluy ont eu, & ont encores de le rabbaïsser. C'est grand miracle, que le Roy, la Roynne, sa mere, & Messieurs ses freres, & tous ceux de son sang, ayent vescu si longuement entre tant de coniurations, & instrumens disposez à les executer, si Dieu ne les eust empeschez. N'est-ce pas miracle, que d'un liēt en hors, vn Roy si malade qu'il n'en pouuoit plus, a plus effectué sur ses ennemis sains & ioyeux, pourueuz d'une meschāte & malheureuse volonté, qu'ils n'ont eu de pouuoir sur luy ne sur les siens? N'estimez vous miracle, que prochain de l'agonie de sa mort, Dieu luy a mis en main vn de ses plus capitaux ennemis? & qu'encores son pauvre corps au cercueil,



cercueil, par le moyen de ses bons  
 seruiteurs reduit les villes surprises,  
 en son obeïssance? De cela nous tes-  
 moignent assez les villes de S. Lau,  
 & Querentan, reduites sous l'o-  
 beïssance de son sceptre depuis son  
 trespas, son bon frere & successeur  
 estant encores en Poulongne, di-  
 stant loin d'icy de cinq cens lieuës,  
 ou enuiron: choses non encores ia-  
 mais aduenues en France. Que si  
 vn Roy Iean est mort soudain  
 apres son Sacre, ou si sainct Loys  
 est mort beaucoup plus loin de ce  
 Royaume, pour le moins leurs suc-  
 cesseurs estoïët dans iceluy: & n'e-  
 stoit par ce moyë le Royaume de-  
 stituë de la presence du Roy legiti-  
 mement succedant à la Couronne.  
 Adioustez à toutes ces merueilles  
 l'admirable grace que Dieu a faite  
 à treshaulte & puissante Princesse,

LA VIE DV

CATHERINE DE MEDICIS,  
mere de noz Roys, & à present Re-  
gente en France, si prudemment  
conduisant tous affaires, qu'il ne  
nous semble point aduis, que nous  
ayons, par maniere de dire, rien  
perdu. Toutes les choses susdites  
sont admirables. Mais le miracle  
n'est gueres moindre, de voir la mi-  
sericorde de Dieu contenir les ef-  
fects de la iustice, qui ne punit les  
crimes & pechez, qui regnent en  
ceste nation, si auant, qu'il ne sem-  
ble pas que Dieu l'ayt chastiee par  
l'espace de quatorze ou quinze  
ans, durant lequel temps elle a esté  
opprimee des guerres ciuiles.

BRIEF, côme c'estoit vn mer-  
ueilleux Roy en vertu, bonté, pie-  
té, modestie, & toutes autres quali-  
tez dignes d'un grand Monarque,  
aussi presque toutes choses estoient

merueilleuses de son temps. Merueilleuses inondations d'eauës ont esté durant son regne, & grands desbordemens de riuieres: mesmes que plusieurs habitations ont esté surprinses par vn regorgement de mer, mesmes en la ville d'Anuers, non sans grãde perte de beaucoup de marchandises, surprinses par ce soudain desbordement de mer. Merueilleux a esté le tremblement de terre de son temps en la ville de Ferrare, où plusieurs edifices furēt pour lors ruinez, d'autres diuisez & fenduz, le Duc de Ferrare contraint de se loger aux chāps soubz vn petit pauillon.

CHOSE merueilleuse a esté remarquee en vne Estoille nouuellement apparue l'an mil cinq cens soixante & treize, sans qu'il y eust aucuns des anciens Mathematiciēs

ou Astrologues, qui l'ayt iamais  
veuë iusques en ce tēps là. Et estant  
descouuerte, plusieurs en ont es-  
crit, & en diuers endroits, tāt d'Es-  
paigne que d'Italie. Beze mesme  
s'en est voulu mesler assez sotte-  
ment, toute fois en homme de son  
mestier, sçauoir heretique, rebelle  
& partial, qui par ses vers vouloit  
persuader telle Estoille auoir signi-  
fié la mort de son Prince, appliquāt  
sur ce propos celle qui apparut a-  
pres la naissance de Iesus Christ,  
qu'il dit auoir signifié la mort  
d'Herode, & par mesme moyen  
cestecy deuoir signifier la mort de  
son Roy, qu'il estime Herode, pour  
auoir chastié ceux, que ie desire-  
rois auoir esté si innocens, que les  
ensans qu'Herode fait meurtrir.  
Mais il est aisé à iuger, combien les  
fondemens qu'il pose, sont faux.



Premierement, que ceux qui ont esté iustement chastiez par le Roy, comme chacun sçait, si l'affection ne le transporte, fussent innocens. Secondemēt, que l'Estoille qui apparut aux Sages, fut diuinemēt enuoyee pour le respect d'Herode: veu qu'elle ne signifioit autre chose, que la venuë de la clarté & veritable lumiere sur les peuples assis en tenebres, ainsi qu'Ésaie le Prophete auoit predict au Chapitre neuuiesme de sa Prophetie. D'où ie collige, que si les Estoilles predictent & preannoncent la mort des meurtriers, que Beze & ses complices ne viuront pas longuement: cōme de vray les persecuteurs de Iesus Christ & de son Eglise ne sont pas de longue duree. Et d'autrepart, que Dieu preuoyant la mort prochaine de nostre bõ Roy, assez

mal disposé de son corps, pour vi-  
ure longuement en ce monde, par  
ceste nouuelle Estoille desja mon-  
stroit le clair & heureux regne de  
nostre Roy Héry, à present regnāt,  
qu'il a si merueilleusement erigé à  
la dignité Royale, qu'il l'a fait plus  
tost regner que d'estre Roy, luy  
mettant en main, tāt l'exercice des  
affaires d'Estat, que des armes,  
quelques annees auant le mettre à  
l'administration souueraine des  
charges de ceste Courōne de Frā-  
ce. D'où chacū se promet vn regne  
non moins admirable, que celuy  
de son frere & predecesseur. Dieu  
en veuille par sa grace distraire &  
destourner les maux, & y ioindre  
tout bien. Ainsi soit.

## Extrait du priuilege du Roy.

**P**AR priuilege du Roy, est defendu à tous Libraires, Imprimeurs, & autres qu'il appartiendra, en quelque sorte ou maniere que ce soit, d'imprimer ou vendre aucunes des Oeuures de M. Arnauld Sorbin R. de Sainte Foy, soient de son inuention ou traduction, sinon au Libraire & Imprimeur, auquel ledict Sorbin aura donné charge & puissance : & ce iusques à neuf ans entiers & consecutifs, apres la premiere impression qui sera faite de chacune desdites Oeuures, inuentions ou traductions, à peine de cōfiscation des liures, imprimez par autres au contraire, & d'amende arbitraire. Ainsi qu'il est plus amplement contenu esdictes lettres de priuilege sur ce donnees à Paris, le quinziesme iour de Decembre, 1564.

Par le Roy en son Conseil.


Signé, DE L'AYBESPINE.

Le present liure est acheué d'imprimer  
le 16. iour de Iuillet 1574.


2002


1890













JAN 1957

